

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenëñedë quïnö wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quïnö bai baquii, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pöngä ponte odömongä atabopa. ² Botö Wäömo guiquënë, Quïnö botö adinö tömänö incæ nö impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobaï wüimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante ii yewæmöintaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cædäni nani toquinque. Edæ iimaï baquionæ wantæ iñö oo baquïnö anguënë.

*Godongämçë nani pönencabo ticete ganca inäni
beyæ Wäo yewæmongampa*

⁴ Botö Wäömo inömo imopa. Atiabæ iñömö wayömö wayömö incæ Codito ingante

godongämæ mini pönencabo önompo æmæmpoque go mencabominiya acæminimpa, ante botö yewæmömopa.

Mönö Mæmpo Wængongui wëenëhedë në quëwengaingä inte ñöwo quëwengä incæ ayæ wantæpiyæ quëwencæcäimpa. Tömengä Önöwoca incæ önompo æmæmpoque go mëwoga önöwocaidi bai ëwocadongä inte Wængongui nänö aacæ tæ contayömö tæcætawë inö në ongongampa. Inique Mæmpocä tönö tömengä Önöwoca waadete pönö cæda ate minitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pönï apænedongä inte wængä ate täno ñäni ömæmongaingä ingampa. Tömengä tömämæ awënë odeyeidi näni Tæiyæ Awënë Odeye inongä ingampa. Tömengä adobai mönö imonte në waadete pönënogä inte mönö wënæ wënæ cægainö adinque tömengä wepæ inte mënogacäimpa. Tömengä adobai waadete pönö cæcä ate minitö gänë entawencæminimpa, ämopa. ⁶ Ayæ Itota, Botö Awënë Odeyebö nempo quëwëninque minitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui qui, ante në godömö bagaimö imopa. Tömengä ñäö bai ëmöñongante mönö waocabo tömenganque ingante waa acäimpa. Tömenganque cöwë në tæi piñænongä inte quingämenque quëwënäni iñönänite tömengä tömänäni Awënë inongä ingampa, ante mönö cöwë angäimpa, ante Amëë, ante ämopa.

7 Ëñeedäni, tömengä edæ boguimancodë
wææñongante,
tömänäni tömengä ingante acædänimpa.
Tömengä ingä nē timpogainäni incæ adobaï
tömengä ingante acædänimpa.
Ayæ tömämæ quëwänäni tömänäni tömengä in-
gante adinque Ca ca wæcædänimpa.
Mänömaï baquïnö anguënë, ante
botö, Amëë, ämopa.

8 Wængonguï Awënë adocanque Tömää nē
Cægaingä inte iïmaï angampa. “Botö Tänobo
ingaimo inte Tömämo inguïmo imopa.” Mänömainö
ante nē angä iñömö tömengä wëenëñedë do
quëwengaingä inte ñöwo quëwengä incæ ayæ
wantæpiyæ quëwencæcäimpa.

*Itota Codito nē ñäö bai ëmongaingä ingante Wäö
nänö adö*

9 Botö Wäömo inömo imopa. Minitö tönïñabo
inte botö minitö tönö Awënë Odeye Itota nempo
quëwëninque mönö tömengä tönö godongämæ
aamö inömö imopa. Botö minitö tönö godongämæ
wæwëmö imö incæte mönö wæntæye inämaï inte
ee cæmopa. Wængonguï nänö angainö ante
apænedinque ayæ, Itota mönö Codito inongä
ingampa, ante, Nö impa, ante botö apænedö
beyænque botö wää tēiwænë Patömoto iñömö tee
mönete bai quëwentabopa.

10 Wængonguï Awënë itædë iñonte Wængonguï
Tæiyæ Waëmö Önöwoca incæ botö imote bæi
ongonte bai cæyongä botö önöñabæ inö adocanque
tedepämo todompeta nani ancadeca we öonte bai
yedæ tē ëñentabopa. 11 Iïmaï angantapa. “Bitö

quïnö wüimonte bai abii, ante yewæmointaa yewæmöe. Yewæmöninque wayömö wayömö incæ Codito ingante godongämæ nani pönencabo önompo æmæmpoque go mencabodäniya iñönänite tömënäni inänite da godöe,” ante angantapa. “Epeto quëwëñömö quëwënäni Ætämidöna quëwëñömö quëwënäni Pedegämo quëwëñömö quëwënäni Tiatida quëwëñömö quëwënäni Tadoditi quëwëñömö quëwënäni Pidadedepia quëwëñömö quëwënäni ayæ Daoditea quëwëñömö quëwënäni Codito ingante godongämæ nani pönencabo nani cabo nani cabo iñönänite bitö tömënäni inänite ii bitö yewæmöninta da godömi æncædänimpa.”

¹² Äñongante botö, Æcänö äna ëñëmoo, ante dadi ëmænte atabopa. Dadi ëmæññömote yædo concædi ti wodönoincade oodo inte badöincade önompo æmæmpoque go mëa ganca ongoncade atabopa. ¹³ Ayæ yædo concædi ti wodönoincade ongöñömö adoyömö tæcæguedë adocanque në Waocä ëñagaingä bai inte ongongä atabopa. Tömengä doyæncoo önöwa ganca incoo mongæninque ayæ tæcæënëmæ inö pacadeyænta oodo inte badöi ëënëmængä ingantapa. ¹⁴ Tömengä ocabo tönö ocagui iñömö dayö näämænta pöni ëmö bai adobai encadinque yoguimö ñäö pöni ëmö bai adobai ñäö bai encacä ingantapa. Ayæ tömengä awinca incæ gonga wo bæcote bai ëmongä ingantapa. ¹⁵ Tömengä önöwa incæ yaëmenta bodonte nani änö gongapamö guii ocoi äñonte ñäö ëmö bai tömengä adobai ëwacä ingantapa. Tömengä tedeyongä æpæ mä conta goyonte æpæ tē bai adobai tē

ēñentabopa. ¹⁶ Tömengä önönempo tömempo incæ nēmöidi æmæmpoque go mēa ganca næængantapa. Ayæ tömengä önöne inö yaēmē tipængaa waingamē engamē ēnedinque yædæ tadete ongongantapa. Ayæ tömengä awinca incæ nænque nanguï tamonte bai ñäo bai emongantapa.

¹⁷ Tömengä ingä adinque botö tömengä önöwa inö wænte bai tæ gowææntabopa. Tæ gowææñömo tömengä önompo tömempo inte botö imote gampodique “Bitö guiñenāmaï incæbiimpa,” ante äninque edæ, “Tömää badönāmaï iñedē botö Do Quëwengäimo imopa. Ayæ tömää iinque bayedē incæ botö Ayæ Pöni nē Quëwëmo incæboimpa,” ante angantapa. ¹⁸ Edæ “Botö nē Quëwengäimo inömo inte nē wænimo incæ ñäni ömæmonte cöwē wantæpiyæ quëwëmo inömo imopa. Waodäni nē wænte godinäni nāni wænte ongöñömö ongöñönänite botö, Cöwē wænāmaï quëwencæminimpa, ante botö tæi piñæmämo inte nē æmo imopa.

¹⁹ “Mänömaï beyæ bitö wiimonte bai bitö adinö ante quinä ñöwo i, ante quinä iincayæ ate baquïi, ante yewæmöe ämopa. ²⁰ Mänii nēmöidi önompo æmæmpoque go mēa ganca botö önönempo tömempo incæ mæ öñoncoo bitö adincoo ante, Æbänö i, ante bitö ēñenāmaï inönö ante botö edonque pöni apænebo ēñencæbiimpa. Botö imote godongämæ nāni pönencabo önompo æmæmpoque go mencabodäniya iñönänite tömēnāni inänite nē aadäni bai nēmöidi inänipa. Ayæ yædo concædi ti wodönoincade oodo inte badöincade önompo æmæmpoque go mēa ganca ongoncadecoo bitö adincoo ante, Quinä bai inänii, ante botö adobai

bitö imite edonque pönī apænebo ate nē ēñēmi bacæbiimpa. Wayömö wayömö incæ botö imote godongämæ nāni pönencabo önompo æmæmpoque go mencabodāniya iñömö tömēnāni yædo concædi tī wodönoincade bai adobaī inānīpa,” ante Waocä nē ēñagaingä iñömö botö imote apænegacäimpa.

2

Godongämæ nāni pönencabo tiæte ganca ināni inānite Itota nänö änö

Epeto iñömö quēwēnāni inānite Itota nänö änö

¹ Ayæ adocä godömenque apænecantapa.

“Epeto iñömö Wængongui ingante godongämæ nāni pönencabo inānite nē aacä acæcäimpa, ante botö änö ante iimaī yewæmoe ämopa. ‘Botö edæ nēmōidi önompo æmæmpoque go mēa ganca botö önönempo tömempo nē nææmo imo inte botö adobaī yædo concædi tī wodönoincade oodo inte badöincade önompo æmæmpoque go men- cæda incade ongöñömö adoyömö tæcæguedē nē cægömo imopa.

² “Minitö æbänö cæminii, ante do ēñēmopa. Edæ nanguī pönī cædinque mīnitö wæntæye ināmaī inte ee cæminīpa. Mīnitö wīwa cædāni inānite Baa ante quēwēmīnīpa, ante do ēñēmopa. Ayæ Wængongui nänö nē da godongaimōni imōnīpa, ante nē änāni incæte ināmaī iñönānite mīnitö, Nāwangä ināni, ante ēñencæte ante apænte adinque, Tömēnāni babæ änānīpa, ante ēñente wæmīnitapa. ³ Mīnitö wæntæye ināmaī inte ee cæminī imīnīpa. Ayæ botö emōwo apænete beyænque wæwēmīni incæte godömenque

godömenque cædinque mīnitō mīmōnē nangæ badāmaī īmīnīpa, ante do ēñēmōpa.

4 “ ‘Incæte adoque pōnī mīni cædinō wīi waa abopa. Mīnitō edæ wīi wēēnēñedē baī ædæmō waadete pōnēmīni īmīnīpa, ante awædō.

5 Edæ mīnitō waa cædimīni īmīni incæte ñōwo wæætē wēnæ wēnæ cæmīni bamīni awædō. Mānīnō ante pōnēedāni. Mānīi mīni wēnæ wēnæ cædinō ante, Ancaa wæwente awædō, ante pōnente ñimpo cædinque mīnitō wēēnēñedē mīni waa cægāi baī adobaī cæte quēwēedāni āmōpa. Amo ēñēninque mīnitō mīni wēnæ wēnæ cædinō ante wædāmaī īmīni adinque botō mīnitō weca pōmaīmōpa. Pōninque mīni yædo concædī tī wodōnoincade nänō ongōñōmō ongōñonte botō ō ænguimodō anguēnē. 6 Incæte adoque mīni cædinō guiquēnē waa abopa. Mīnitō edæ Nin-codaitaidi nāni ānāni nāni cædō ante adinque pīinte īmīnīpa. Botō adobaī tōmēnāni nāni cædō ante adinque pīinte īmōpa.

7 “ ‘Wayōmō wayōmō incæ botō imote godongāmæ nāni pōnencabo īnānite Wængonguī Ōnōwoca quīnō angāā, ante tōmengā nänō ānō ante nē ēamonca īmīni inte ēñēedāni. Wængonguī waa gōnea īñōmō māniñōmō adowænque quēwenguiwæ pædiwæ iwæmpa. Tæi ēmonte nē gānā cædāni īnānite botō īñōmō, Māniwæ inca cæncæmīnīmpa, ante pædæ godoncæboīmōpa, ante māninque āmōpa,” ante Waocā nē ēñagaingā īñōmō botō imote apænægacāimōpa.

Ētāmīdōna īñōmō quēwēnāni īnānite Itota nänō ānō

8 Ayæ adocā godömenque apænecantapa.

“Ætämidoña iñömö Wængongui ingante godongämæ nani pönencabo inänite në aacä acæcäimpa, ante botö änö ante iimaï yewæmoe ämopa. ‘Tömää badönämaï iñedë botö Do Quëwengaimo imopa. Ayæ tömää iinque bayedë incæ botö Ayæ Pöni në Quëwëmo incæboimpa. Botö në wænimo incæ ñowo wæætë ñäni ömæmongaimo imopa.

⁹ “ ‘Minitö wæwëmini inte adobaï ömæpomini iminipa, ante botö do ëñëmopa. Incæte minitö nö ëamini iminipa. Oodeoidi pancadäniya, Mönitö Wængongui ingante möni pönencabo imönipa, ante në änäni incæte wii mänömaï inänipa. Tömënäni minitö iminite ancaa piinte babæ änewënäni inänipa, ante botö do ëñëmopa. Mäninäni iñömö Tatäna ingante nani ëñencabo inte mänömaï cædänipa töö. ¹⁰ Minitö quinö beyæ wæwencæ cæmini imini incæte guiñënämaï iedäni. Tatäna incæ, Æbänö cæminii, ante acæte ante cæcä beyænque waodäni pancaminiya iminite tee mönecædänimpa. Önompo tipæmpoga ëönæ iñonte wæwenguimini iminipa. Iinque minitö mini wænguinque wæmini incæ cöwë pönëninque ædæmö cædäni. Mänömaï në cæmini iinque botö, Mini cöwë quëwenguinta, ante poganta bai minitö iminite pönömo æmaimnipa.

¹¹ “ ‘Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante në ëamonca imini inte ëñeedäni. Wadäni adopoque wæninque nani mempoga wænguimämo bai tæi ëmonte në gänä cædäni iñömö wæætë mempoga wænämaï

incädänimpa,’ ante mäninque ämopa,” ante Waocä nē ēñagaingä iñömö botö imote apænegacäimpa.

Pedegämo iñömö quëwënäni inänite Itota nänö änö

¹² Ayæ adocä godömenque apænecantapa.

“Pedegämo iñömö Wængongui ingante godongämæ nani pönencabo inänite nē aacä acæcäimpa, ante botö änö ante iimaï yewæmoe ämopa. ‘Botö edæ yaemē tipængaa waingamē engamē nææmo imopa.

¹³ “Ædönö quëwëmīni, ante botö do ēñëmopa. Tatäna contaïmpa ongonte nänö aayömö adoyömö mīnitö quëwëmīni imīni incæte botö imo edæ ñimpo cädämaï quëwëmīni imīnīpa. Mīni quëwëñömö Tatäna adoyömö quëwengä ininque, Antipato edæ botö änö ante cöwē pönëninque ædæmö apænedongä iñongante mäniñömö quëwënäni tömengä ingante wænönäni wængantapa. Tömengä wæñedē incæ mīnitö botö imote edæ, Dicæ pönëmogaa, änämaï imīnīpa.

¹⁴ “ ‘Incæte pancaa mīni cædinö wīi waa abopa. Edæ pancamīniya docä Badäo nänö odömönte apænegainö ante ēñëwëmīni awædö. Tömengä iñömö, Badaco godö cæcä beyænque idægoidi tee tëwate bai oda cæcädänimpa, ante cædinque adocä Badaco ingante odömönte apænegä ēñente cægacäimpa. Wadäni, Mönitö wængongui cængui impa, ante nani cönönī ante, Mīnitö cæedäni, ante Badaco iñömö idægoidi inänite odömönte apænegacäimpa. Ayæ onquiyænäni tönö godö towente cæedäni, ante

odömonte apænegacäimpa. ¹⁵ Ayæ pancaminiya adobaï Nincodaitaidi nani odömonte apænedö ante eñewëmini awædö. ¹⁶ Mänömaï beyæ mini wënæ wënæ cædinö ante, Ancaa wæwente awædö, ante pönte ñimpo cæedäni. Minitö mini wënæ wënæ cædinö ante wädämaï imini adinque botö wantæ iñonte minitö weca pömaïmopa. Pöninque tömënäni nani odömonte apænedö ante nê eñewënäni iñönänite botö önöne incæ yaëmë enedinque yædæ tadedinque guädö guëa cæcæboimpa.

¹⁷ “ ‘Wayömö wayömö incæ botö imote godongämæ nani pönencabo inänite Wængongui Önöwoca quinä angää, ante tömengä nänö änö ante nê ëamonca imini inte eñëedäni. Tæi ëmonte nê gänä cædäni inänite cængui mänää nani angainö botö wë wodöni cængui iñonte godömo ænte cæncædänimpa. Adodäni inänite adobaï dica näämæntaca godömo æncædänimpa. Wa ëmöwo ante pemöninque mänincaa yewæmonte ingæimpa. Nê ænänique mänïwo eñënäni inänipa,’ ante mäninque ämopa,” ante Waocä nê eñagängä iñömö botö imote apænegacäimpa.

Tiatida iñömö quëwënäni inänite Itota nänö änö

¹⁸ Ayæ adocä godömenque apænecantapa.

“Tiatida iñömö Wængongui ingante godongämæ nani pönencabo inänite nê aacä acæcäimpa, ante botö änö ante iïmaï yewæmöe ämopa. ‘Botö edæ Wængongui Wëmo inömo imopa. Botö awinca incæ gonga wo bæcote bai nê ëmömo imopa. Botö önöwa incæ yaëmenta bodonte nani änö bai ñäö bai nê ëwabo imopa.

19 “ ‘Minitö æbänö cæminii, ante mīni waadete pönēnō ante mīni wede pönēnō ante wadāni inānite mīni waa cædō ante botō do eñēmopa. Minitö wæntæye ināmaī inte ee cædinque godongāmæ cæmīni imīnīpa, ante ayæ, Wēenēñedē do waa cædimīni inte ñowo godōmenque waa cæmīni imīnīpa, ante adobaī do eñēmopa. ²⁰ Incæte adoque pōni mīni cædinō wīi waa abopa. Onquiyængä Etabete nē emongä iñömō edæ, Wængonguī beyæ nē apænebo, ante nāmā incæ nē angä ingante wido cædāmaī imīni inte wæætē tōmengä ingante ayæ godōmenque Ao äminīpa tōö. Iñæmpa tōmengä iñömō botō imote nē cædāni inānite nänö odōmonte apænedō beyænque oda cæte gocædānīmpa, ante cæcä beyæ tōmēnāni onquiyænāni tōnō godō towente cædānīpa. Wadāni, Mōnitō wængonguī cænguī impa, ante nāni cōnōni cænānīpa tōö. Mänōmaī cæcædānīmpa, ante māningä onquiyængä odōmonte apænecāmpa.

21 “ ‘Tōmengä nänö towente cædimāmo ante, Botō wēnæ wēnæ cæbo inte ancaa wæwente awædō, ante pōnente wabänō ñimpo cæquingää, ante botō tōmengä ingante ee pānāmaī intabopa. Incæte tōmengä nänö wēnæ wēnæ cædō ante wædāmaī quēwengä ingampa. ²² Iñique botō, Tōmengä ingante cæbo beyænque wēnæ wēnæ bate wæwencæcāmpa, ante cæcæboimpa. Ayæ tōmengä nänö odōmonte apænedinō bai nē eñente cædāni iñömō tōmengä tōnō nāni guēa godō mōwēninō ante, Mōnitō wēnæ wēnæ cæmōni inte ancaa wæwente awædō, ante pōnente ñimpo cædāmaī ināni iñique tōmēnāni

inänite adobaï botö cæbo beyænque nanguï wënæ wënæ bate wæwëmainänipa. ²³ Tömengä wënäni inänite wænömo wæncædänimpa. Ininque wayömö wayömö incæ botö imote godongämæ nani pönencabo tömancabodäniya iñömö, Botö incæ tömënäni nani mimöno tönö ocaidë, Æbänö pönënänii, ante nē eñëmo inömo imopa, ante eñencædänimpa. Ayæ minitö cædi bai ante adinque botö wæætë adobaï minitö tömämïni iminite cæcæboimpa.

²⁴ “ ‘Wamïni pancamïniya guiquënë Tiatida iñömö quëwëmini inte mäningä onquiyängä nänö odömonte apænedö ante minitö nē pönënämaï iminipa. Ayæ Tatäna wë wodonte nänö angainö ante eñënämaï iminitapa. Ininque botö minitö iminite iïmaï ämopa. Minitö teëmë mongæncoo mongænte gote bai wädämaï incæminimpa, ante wadö ante änämaï incæboimpa. ²⁵ Wæætë botö ocæ ëmænte wæænganca minitö edæ do mïni pönënö ante ñimpo cædämaï iedäni. Mäinque ämopa.

²⁶ “ ‘Inguipoga iinque baganca ædänidö botö änö nē cædönäni inte tæï ëmonte nē gänä cædäni inänite botö pönö cæbo ate tömënäni nämä tæï piñænäni badinque tömämæ quëwënäni inänite nē änäni bacædänimpa. ²⁷ Botö Mæmpo botö imote pönö cæcä beyænque Awënë badinque nämä tæï piñænte inte nē ämo bai botö adobaï tömënäni inänite pönö cæbo beyænque awënëidi badinque aacædänimpa. Tæiyæ awënë tömengä nempo quëwënäni inänite aacä bai tömengä iñömö tömämæ quëwënäni inänite, iïmaï cæedäni,

ante aacæcäimpa. Dai inte bæte cængæmö tæi ænacä nancate bai cædinque tömengä adobaï wabæca wabæca quëwënäni inänite nanguï pante cæcæcäimpa. ²⁸ Mäninäni inänite botö adobaï wadaamö ñäo bayonte apäimö incæ godömo æncædänimpa.

²⁹ “ ‘Wayömö wayömö incæ botö imote godongämæ nani pönencabo inänite Wængonguï Önöwoca quinä angää, ante tömengä nänö änö ante nē ëamonca imini inte ëñeedäni,’ ante mäninque ämopa,” ante Waocä nē ëñagaingä iñömö botö imote apænegacäimpa.

3

Tadoditiidi inänite Itota nänö änö

¹ Ayæ adocä godömenque apænecantapa.

“Tadoditi iñömö Wængonguï ingante godongämæ nani pönencabo inänite nē aacä acæcäimpa, ante botö änö ante iimaï yewæmöe ämopa. ‘Wængonguï Önöwoca incæ önompo æmæmpoque go mëwoga önöwocaidi ewocadongä ingampa. Botö iñömö tömengä ingante nē ewocate quëwengäimo inte nëmöidi önompo æmæmpoque go mëa ganca inäni nē næænte ingäimo imopa.

“ ‘Iñinque, Minitö æbänö cæminii, ante do ëñëmopa. Minitö müimini quëwëminipa, ante wadäni apænedäni incæte minitö wii waa cæte quëwëmini inte do wængainäni bai iminipa töö.

² Edæ, Botö Wængonguï ayongä mini cædinö wii eyepæ cæminipa, ante adinque botö, Ñäni ömæmöedäni, ante ämopa. Ñäni ömæmöinque

mīnitō, Ayæ mīnāni quēwēnāni incæ nē wæncæ cædāni bai badāni incæte tōmēnāni wænāmaī inte wæætē tæimō bacædānimpa, ante cædāni. ³ Mānōmaī beyæ, Quiēmē do ænimīni bai imīni, quiēmē ante do ēñēmīni, ante māninō ante wæætē adodō ante pōnēdāni. Pōnēninque mīnitō māninō ante ēñente cædāni. Ayæ mīni wēnæ wēnæ cædinō ante, Ancaa wæwente awædō, ante pōnente ñimpo cædāni. Wæætē mīnitō wīi ñāni ömæmonte bai imīni ate wædinque botō incæ mīnitō weca awēmō nē ængā bai pōmaīmopa. Ayæ, Awēmō nē ængā æyedēnō ponguingāā, ante ēñēnāmaī ināni bai botō adobai mīnitō ēñēnāmaī iñōmīni mīnitō weca awēmō ponguimo apa quēwēmīni.

⁴ “ Incæte Tadoditi iñōmō mīni quēwencabo iñōmīnite pancadāniya tōmēnāni weocoo wentamō nāmōnāmaī bai iñināni inte nē waa cæte quēwēnānipa. Mānināni waa cæte quēwēnāni beyæ eyepæ inōnāni inte weocoo nāāmæntacoo mongænte botō miñæ gocædānimpa. ⁵ Nē tæi emonte gānā cædāni iñōmō adobai weocoo nāāmæntacoo mongæncædānimpa. Ayæ, Quēwenguinta, ante Wængonguī nänō yewæmongaintaa mānināni emōwo do yewæmōi ininque botō cōwē wadæ cædāmaī incæboimpa. Wæætē botō Mæmpo Wængonguī weca ayæ tōmengā anquedoidi weca botō, iñināni botō miñæ gogaināni inānipa, ancæboimpa.

⁶ “ ‘Wayōmō wayōmō incæ botō imote godongāmæ nāni pōnencabo inānite Wængonguī Önōwoca quīnō angāā, ante tōmengā nänō änō

ante nē ēamonca imīni inte ēñēedāni, ante māninqe āmopa,” ante Waocā nē ēñagaingā iñömö botö imote apænegacäimpa.

Pidadedepiadi inänite Itota nänö änö

⁷ Ayæ adocä godömenque apænecantapa.

“Pidadedepia iñömö Wængongui ingante godongämæ nāni pönencabo inänite nē aacā acæcäimpa, ante botö änö ante iimaï yewæmoe āmopa. ‘Botö edæ nē Tæiyæ Waëmö ingaimo imopa. Nö ante cægaimo inte botö docä Awënë Dabii nänö wi ænequi nē næængaimo imopa. Ininqe quinö odemö botö wi ænebo incæ mäninemö wacä ædö cæte tee mönequingää. Ayæ quinö odemö botö tee mönebo incæ mäninemö wacä ædö cæte wi ænequingää.

⁸ “ Minitö æbänö cæminii, ante do ēñēmopa. Minitö cæcæminimpa, ante botö odemö wi ænete bai cæbo aedāni. Æcänö mäninemö wæætē tee mönequingää. Edæ dæ angampa. Minitö wii tæi piñæmīni imīni incæte botö angainö ante ēñente cæmini inte botö emöwo ante, Dicæ ēñēmōniyaa, ante änāmaï inimīni iminipa. Botö do ēñēmopa.

⁹ Möni oodeocabo imöni incæ pancadāniya, Mönitö Wængongui ingante möni ēñencabo imönipa, änāni incæte ināmaï inänipa. Wæætē tömēnāni iñömö babæ anewēnāni inänipa. Tatāna ingante nāni ēñencabo inänipa töö. Botö godö cæbo ate adodāni mīnitö weca ponte mīnitö önöwa gäänē ædæ wææncædänimpa. Ayæ, Botö mīnitö imīnite nē waadete pönengaimo imopa, ante botö godö odömömo ēñencædänimpa.

¹⁰ Minitö imīnite, Ee cædinque wæntæye ināmaï

iedäni, ante botö angainö ante eñente nē cædimini imini adinque botö wæætē mīnitō imīnite wææ aacæboimpa. Inguipoga quēwēnāni tōmānāni nāni wæwenguimāmo ancaa baquīnō anguēnē. Edæ Tatāna, Æbānō quēwēnāni, ante acæte ante cæcā ate nāni wæwēñedē botö iñömō, Mīnitō wæwēnāmaī incæminimpa, ante mīnitō imīnite wææ aacæboimpa.

11 “ ‘Botö oo ocæ emænte ponguimo imopa. Wængongui poganta nänö godonguinta, ante mīnitō imīnite godongä æncæminimpa. Māninta mīni ænguinta iñömō wacā ænāmaī incæcāimpa, ante mīnitō mīni entawēnō ante godōmenque godōmenque ñimpo cædāmaī iedāni. 12 Botö cæbo ate waodāni tæi emonte nē gānā cædāni iñömō tōmēmo Wængongui tæiyæ waēmō oncōnē wantæpiyæ quēwenguīnānidō anguēnē. Tōmēnāni Wængongui weca cōwē quēwente taodāmaī incædānimpa. Tōmēnāniya botö Wængongui emōwo yewæmoncæboimpa. Mii Eedotadēē nāni añömō iñömō botö Wængongui nänö quēwēñömō iñonte māniī tōmengä nänö quēwēñömō incæ öönædē inō da pōnongä wæængæimpa. Māniī Wængongui nänö quēwēñömō emōwo botö adobaī tōmēnāniya yewæmoncæboimpa. Ayæ botö wawo botö ñōwo pemongaīwo adobaī tōmēnāniya yewæmoncæboimpa.

13 “ ‘Wayömō wayömō incæ botö imote godongāmæ nāni pōnencabo inānite Wængongui Önōwoca quīnō angää, ante tōmengä nänö änō ante nē eamonca imini inte eñeedāni,’ ante māninqe amopa,” ante Waocā nē eñagaingä

iñömö botö imote apænegacäimpa.

Daoditeaidi inänite Itota nänö änö

¹⁴ Ayæ adocä godömenque apænecantapa.

“Daoditea iñömö Wængongui ingante godongämæ nani pönencabo inänite në aacä acæcäimpa, ante botö änö ante iimaï yewæmöe ämopa. ‘Botö emöwo Amëë, ante pemongaïmo inte botö cöwë, Näwangä impa, ante në cöwë ædæmö apænegaïmo imopa. Wëenëñedë Wængongui nänö badongäñedë mäniñedë botö tömengä tönö godongämæ badongaïmo beyænque tömengä nänö badongaincoo tömancoo Awënë badingue botö në ämo imopa.

¹⁵ “ ‘Minitö æbänö cæminii, ante do ëñëmopa. Yogui pæ bai inämaï imini incæte ocoi ämæ bai adobai inämaï iminipa töö. Iñæmpa yogui pæ bai iminipa diyæ waa aquimoo. Edæ ocoi ämæ bai iminipa diyæ waa aquimoo. ¹⁶ Minitö yogui pæ bai inämaï imini incæte ocoi ämæ bai inämaï imini inte wæætë wiï eyepæ cæmini inte gänë ämæ bai iminipa töö. Mänömaï beyæ botö edæ tömömo önönë towæ tänonte bai minitö iminite adobai wido cæcæ cæbo apa quëwëminii. ¹⁷ Minitö, Mönitö nanguï ëamöni imönipa, ante äminipa. Edæ, Tömömöni mäincoo gæte da wëningue eyepæ ëamönipa, ante äminipa. Iñæmpa mäninö ante wapiticæ pönente äminipa. Minitö mini wæwënö incæ ëñënämaï iminipa töö. Minitö æbänö bate cæminii, ante adingue wadäni, Minitö wodi, ancædänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömaï imönipa, ante ëñëminiyaa.

18 “ ‘Mänömaï beyæ botö, İïmaï cæedäni, ante waadete ämopa. Botö pönö cæbo beyænque mînitö wæætë waa bate bai nanguï cæcæmînimpa, ämopa. Mänînö botö pönö cædö iñömö oodo gongapamö aca podonte ate waëmö oodo bate bai impa. İinque mînitö, Mönitö nanguï ëamöni bacæmönimpa, ante cædinque botö weca ponte tömëmo oodo ante godonte æedäni. Ayæ, Ömaamöni inämaï incæmönimpa, ante guingo imönämaï incæmönimpa, ante mînitö botö weocoo näamæntacoo godonte ænte mongæedäni. Ayæ mînitö, Awinca waa acæimpa, ante cædinque tömëmo awinca cönömöimæ godonte æninque cönömöedäni.

19 “ ‘Botö nê waadete pönënanî inänite botö pîinte ämo inte adobaï pante cæbo imopa cæmîniî. Mînitö nanguï cædinque mîni wënæ wënæ cædînö ante, Ancaa wæwente awædö, ante pönente ñimpo cæedäni. ²⁰ Ëamonca ëñëedäni. Botö incæ odemö yabæ inö ongonte bai waomîni mîmöno a ongöninque, Wi ænequï, ante aa peyömo waocä æcämenque incæ ëñëinque odemö wi ænete botö imo, Pö guie, angä ininque botö iñömö edæ tömengä mîmöne pö guicæboimpa. Tömengä mîmö botö oncö bai iñonte botö tömengä tönö cænte bai cöwë quëwencæboimpa. Ayæ tömengä wæætë botö tönö cænte bai cöwë quëwencæcäimpa. ²¹ Botö tæï ëmonte nê gänä cægäimo inte botö Mæmpo nänö aacæ tæ contaimpaa tömengä tönö guëa tæ contagäimo bai nê tæï ëmonte nê gänä cædäni iñömö adobaï botö tömëmo aacæ tæ contayömo

botö tönö godongämæ tæ contacädänimpa, ante ämo adopaa tæ contaquinäni.

22 “Wayömö wayömö incæ botö imote godongämæ näni pönencabo İnänite Wængonguï Önöwoca quinä angää, ante tömengä nänö änö ante tömënäni nē ēamonca imini inte ēñēedäni, ante mäninque ämopa,” ante Waocä nē ēñagaingä iñömö botö imote apænegacäimpa.

4

Öönædē iñömö Wængonguï ingante watapæ apænedäni

¹ Botö Wäömo inömo inte ayæ ate æmö ayömote öönædē inö odemö wi ænete atabopa. Todompeta näni ancadeca we öonte yedæ tē bai tedepämo täno botö ēñēninö iñömö ñowo wæætē adopämo botö imote iimaï äninque, “Iñömö pö æe. Æñömite botö, Ayæ ate quinä baquënë inguüi, ante bitö imite edonque odömömo acæbiimpa,” angantapa.

² Mäninö ante äñongä Wængonguï Önöwoca incæ botö imote bæi ongonte bai cæyongä botö wüimonte bai adinque iimaï atabopa. Öönædē inö Awënë tæ containpa ayömo adocanque mäniñömö tæ contacä atabopa. ³ Mäningä adoyömö nē tæ contadongä iñömö dica ñäö bai ēmonca bai adobai ēmongä ingantapa. Aatape näni äninca bai codönadina näni äninca bai mäninca mencaa ñäö bai inca bai tömengä adobai ēmongä ingantapa. Awënë tæ containpa iñömö daimē dica bai etēmedada näni äninca ēmonca bai inte æidämæ waimē pönī gongæmēnimpa.

⁴ Mänimpa Awënë nänö aacæ tæ containpa

waimpacoo bæinticoatodo ganca mänimpopacoo mäninömö godämæ a ongompapa. Adopacoo inömö nē aadāni nē Picænāni bæinticoatodo ganca mänimpodāni tæ contadinque nāāmæntacoo mongæninqe poganta oodo inte badöinta da wencate a ongönānitapa. ⁵ Awënë tæ containpa inö näinte yædæ yædæ ta gote detæbo tæi tæi tē tēñonte yedæ pōni ānimpā. Ayæ Awënë tæ contayömö tæcætawē inö ti wodōnoincade onompo æmæmpoque go mencadea wocædöincadecoo a ongönimpā. Wængonguī Önōwoca incæ onompo æmæmpoque go mēwoga önōwocaidi bai ewocadongā inte mänincadecoo bai ingampa.

⁶ Ayæ Awënë tæ containpaa tæcætawē inö adobai gāwapæntibæ bai inñonte awocawænta bai inimpā. Ayæ Awënë tæ containpa inömö miināni quēwēnāni mēnaa go mēnaa ināni godämæ a ongönānitapa. Mänināni inömö tæcætawē inö önōñabæ inö tōmāo awinca emōnāni atabopa. ⁷ Tānocā miingā quēwengā botō adingā inömö nēöo bai emongampa. Ayæ wacā miingā quēwengā botō adingā inömö wagada mæmpo bai emongampa. Wacā miingā quēwengā botō adingā inömö tōmengā awinca waocā awinca bai emongampa. Ayæ tōmangā miingā quēwengā botō adingā inömö guingāmōwæ pao pao gocā bai atabopa. ⁸ Mēa go mēa miināni quēwēnāni incæ adocanque adocanque onompo æmæmpoque go adoguēnepænque emænte quēwēnāni inānipā. Ayæ adodāni inte tōmēnāni baonga godämæ tōmanga nanguī pōni awinca emonte ænōmengadænguēnepæ incæ awinca adobai emōnānipā. Mänināni edæ

itædē woyowotæ ñimpo cædämaï inte iïmaï ante ämotamïni änanipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante ämönipa.

Wængonguï Awënë bitö adobique Tömää nē Cæbi inte

wëenëñedē do nē quëwengaïmi ïmi ñöwobi adobi inömi inte ayæ wantæpiyæ cöwë quëwencæbiimpa.”

Ante ämotamïni ante cöwë änanipa.

⁹ Awënë tæ containpaa nē tæ contadongä inte nē wantæpiyæ cöwë quëwengaingä ingante apænedinque mäa go mäa mïlnäni quëwënäni iñömö iïmaï ante apænedänipa. Bitö ñäö emömi imipa, ante apænedinque tömënäni, Bitö imite waa amönipa. Mönitö bitö imi waa ate pönente apænemönipa, ante apænedänipa. ¹⁰ Mänömaï ante apæneyönäni nē aadäni nē Picænäni iñömö bæinticoatodo ganca mänimpodäni Awënë tæ containpaa nē tæ contadongä inte nē wantæpiyæ cöwë quëwengaingä weca ædæ wææninque tömengä ingante, Bitö Wængonguï Awënë imidö angüenë, ante watapæ apænedinque tömënäni poganta gä æncadinque Awënë tæ containpa gäänë cö cædinque iïmaï ante ämotamïni ante änanipa.

¹¹ “Bitö iñömö mönitö Wængonguï Awënë imidö, ämönipa. Bitö badöinënö, ante pönente ingaïmi inte öönædë ongönäni tönö inguipoga ongönäni tönö tömänäni inänite badongaïmi imipa.

Bitö wïi badömi bai tömänäni badongainäni quëwënämaï dæ ancædönänimpa.

Mänömaï beyæ bitö eyepæ inömi iñömite, Bitö ñäö
 emömidö angüenë, ante mönitö bitö imite
 waa amönipa.

Bitö nämä tæi piñænte në cæbi imidö, ante bitö
 imite ämönipa,”
 ante ämotamini ante änänipa.

5

Wængongui Codotedo yewæmöinta wi æmpocampa

¹ Ayæ Awënë nänö aacæ tæ contaimpaa në
 tæ contacä iñömö tömengä önönempo tömempo
 incæ yewæmöinta dadi ompointa næængä
 atabopa. Mäninta tipäataa yewæmöinta impa.
 Adotaa yæwedeta iñömö guiñenca bai inte tee
 bædinta önompo æmæmpoque go mentaa inimpa.
² Ayæ Wængongui anquedo adocanque në tæi
 emongaingä inte yedæ aa pecä atabopa. “Mäninta
 dadi ompointa wi æmpoquii, ante æcänö nö waa
 pöni inongä inte eyepæ inte tee bædedinta waa waa
 ænete wi æmpoquingäa,” angantapa. ³ Ayæ öönæde
 incæ inguipoga incæ tadömengadænga incæ
 cöwä ayönäni, Æcänö mäninta wi æmpoquingäa,
 cæncadenta inö æcänö aquingäa, ante edæ dæ
 angantapa. ⁴ Æcänö nö waa pöni inongä inte
 eyepæ inte dadi ompointaa wi æmpoquingäa
 iñömö edæ dæ angampa. Cæncadenta inö æcänö
 aquingäa ante dæ angampa, ante adinque nangui
 pöni Ca ca wætabopa. ⁵ Ca ca wæbo adinque
 në aadäni në Picænäni iñönäni adocanque në
 Picængä incæ botö imo, “Wædamaï ie. Wæætë
 cöwä ae, angantapa. Adocanque onguiñængä
 iñömö mäninta wi æmpoquingä a ongongampa.

Awënë Dabii Pæingä incæ tömengä iñömö docä Oodaa pæinäni nāni cabo iñonte nē nēöö bai tæi emönongä inte nē gänä cæcä ingaingä ingampa. Tömengä iñömö edæ eyepæ inte tee bædedinta önompo æmæmpoque go mentaa wi æmpodingue dadi ompointa wi æmpocæcäimpa,” angantapa.

⁶ Ayæ Wængonguï Codotedo nāni wænönāni nē wæningä bai ingä atabopa. Tömengä Awënë Wængonguï nänö aacæ tæ contayömö tæcæguedē ongöñongä miināni quëwënāni mēnaa go mēnaa ināni tönö nē aadāni nē Picænāni godāmæ a ongönāni atabopa. Tömengä iñömö önömoncawæncoo önompo æmæmpoque go mēwāa emoncadinque awinca önompo æmæmpoque go mēmonga emongacäimpa. Edæ Wængonguï Önöwoca incæ önompo æmæmpoque go mēwoga önöwocaidi bai nänö ewocadö bai mänii awincacoo inānipa. Adodāni önöwocaidi inānite inguipoga da pönongä pöninque tömēnāni inguipoga tömāmæ gote cæwodāni inānipa. ⁷ Ayæ Wængonguï Codotedo iñömö Awënë tæ contayömö pöninque nē tæ contadongä önönempo tömempo inö dadi ompointa nänö nææninta ö ængantapa. ⁸ Tömengä mäninta ö ængä ate mēa go mēa miināni quëwënāni tönö nē aadāni nē Picænāni bæinticoatodo ganca mänimpodāni Wængonguï Codotedo weca ponte ædæ wæænānitapa. Iināni tömānāni ampoquï adapa nāni änö nææninque owæta oodo inte nāni badöinta oguï waaquï eyede enga næænānitapa. Wængonguï quinäni tömengä ingante nāni apænedö iñömö mänii oguï waaquï bai impa. ⁹ Tömēnāni mä äninque iimaï ante ämotamini ante

änänitapa.

“Bitö imite wænönäni nē wænimi inte bitö nö waa pönī inömi imipa.

Īninque bitö eyepæ inte dadi ompointaa ænte tee bædedinta wāa wāa ænete wi æmpoquimi imipa.

Waadäni näni cabo waodäni näni cabo incæ wadö näni tedecabo wadö näni tedecabo incæ wacä awënë näni cabo wacä awënë näni cabo incæ wabæca näni quëwencabo wabæca näni quëwencabo incæ waodäni inänite bitö,

Wængonguī quimīni bacæminimpa, ante cædinque nämä wepæ godonte ængabiimpa.

¹⁰ Bitö nempo quëwëninque tömënäni bitö tönö godongämæ aadäni bacædänimpa, ante badongabiimpa.

Mönö Wængonguī ingante cæcædänimpa, ante bitö pönö cæbi ate tömënäni,

Mönö Awënë Odeye Wængonguī qui, ante nē godönäni bagainäni inänipa.

Mäninäni edæ awënëidi badinque inguipoga quëwënäni inänite aacædänimpa.”

ante ämotamīni änänitapa.

¹¹ Ayæ ayömo Wængonguī anquedoidi iñömö bacoo inäni inte ämotamīni änäni eñëninque, Tömënäni æpodö miido ganca inänii, ante botö ædö cæte tee mampote eñënguimoo. Edæ miinäni quëwënäni tönö nē aadäni nē Picænäni tönö Awënë tæ contaimpa gäänë tæcæguedë ongöñönänite Wængonguī anquedoidi iñömö yabæque godämæ gongænte ongönänitapa. ¹² Mäniiñömö godämæ ongöninque tömënäni yedæ äninque iïmaī ante ämotamīni änänitapa.

“Wængongui Codotedo ingante wænönäni nē
wæningä inte tömengä nö waa pönī inongä
inte eyepæ ingampa.

Tömengä edæ tæi piñængä ingänö anguënē.

Tömengä quincodö incæ tömancoo nē eacä inte
tömänö ante eñnongä ingänö anguënē.

Tömengä tæi piñænte inte tömää nänö cæinönö
cædongä ingampa.

Tömengä ingante, Bitö imite waa amönipa. Bitö ñäö
ëmömidö anguënē, ante bitö imite watapæ
apænemönipa,” änänitapa.

¹³ Ayæ Wængongui nänö badongainäni öönædē
quëwënäni incæ inguipoga quëwënäni incæ
tadömengadæ quëwënäni incæ gäwapæntibædē
quëwënäni incæ tömänäni adoyedē iimaī ante
ämotamini ante änäni eñentabopa.

“Awënē tæ contaimpaa nē tæ contadongä ingante
ayæ Wængongui Codotedo ingante tömäna
inate iimaī amönipa.

Minatö iminate watapæ amönipa. Minatö iminate
waa amönipa.

Minatö ñäö ëmöminadö anguënē. Minatö tæi
piñæmīna iminadö anguënē.

Wantæpiyæ iñonte mäninö ante cöwē
ancæmönimpa,” ante änänitapa.

¹⁴ Ante añönäni mäa go mäa mīinäni quëwënäni
adobai, “Iimaī baquinö anguënē,” ante, “Amëe,”
änänitapa. Ayæ nē aadäni nē Picænäni iñömö ædæ
wææninue watapæ änänitapa.

6

Tee bædinta önompo æmæmpoque go mentaa

¹ Ayæ Wængongui Codotedo iñömö tee bædinta önompo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mäa go mäa miinani quëwënäni incæ adocanque iñömö tömengä nänö tedepämo detæbo të bai inte botö imote, “Pöe,” ante yedæ angä eñentabopa. ² Tæcæ ayömo cabayo näämænta eñacä do a ongongä atabopa. Cabayo inte nē tæ contacä iñömö to piyæncaimpa næængantapa. Tömengä iñömö wadäni inänite guëadö guëa cæte tæi emongä inte gänä cædongä iñongante Awënë poganta pönönäni æninqe tömengä wæætë guëadö guëa cæcæte ante cabayo mongænte gocantapa.

³ Ayæ Wængongui Codotedo wæætë tee bædedinta wataa wi æmpoyongante mäa go mäa miinani quëwënäni incæ wacä iñömö botö imote, “Pöe,” angä eñentabopa. ⁴ Ayæ wacä cabayo opatawæ gonga emö bai eñacä pongantapa. Waodäni incæ wacä ingä wacä ingä wænoncædänimpa, ante cædinqe Wængongui godö angä beyænque cabayo inte nē tæ contacä iñömö, Inguipoga quëwënäni piyænë cædämaï incædänimpa, ante nē cæcä bacantapa. Ayæ, tömengä ingante ñænæ yaëmë bai pönönäni ængantapa.

⁵ Ayæ Wængongui Codotedo wæætë tee bædedinta wataa wi æmpoyongante mäa go mäa miinani quëwënäni incæ ayængä iñömö botö imote, “Pöe,” angä eñentabopa. Tæcæ ayömo cabayo wentamö eñacä do a ongongä atabopa. Cabayo inte nē tæ contacä iñömö tee manguï önönempo næængä ingantapa. ⁶ Ayæ mäa go mäa miinani quëwënäni weca tedepämo bai eñeñömo,

“Todigomö tönö tebadamö nāni cænguimö, ante nangui nāni godonte æimö impa, ancæte ante iimaī angä eñentabopa. Tömää itæde cædāni ate nāni cæganca beyæ todigomö mēa diboda pōni tee mangui ganca māninqe godonte æncædānimpa. Adobaī tömää itæde cædāni ate nāni cæganca beyæ tebadamö önompo æmæmpoqe go adoque diboda tee mangui ganca māninqe godonte æncædānimpa. Ayæ oginguipæ ante odibomö nāni ämō eyepæ pæcæimpa, ante ee aedāni. Biinömæ ante yowe eyepæ pæcæimpa, ante ee aedāni.”

⁷ Ayæ Wængongui Codotedo wæætē tee bædedinta wataa wi æmpoyongante mēa go mēa miināni quēwēnāni incæ tömangä iñömö botö imote, “Pöe,” angä eñentabopa. ⁸ Tæcæ ayömö cabayo nāmēnaa eñacā do a ongongä atabopa. Cabayo inte nē tæ contacā iñömö tömengä emōwo, Nē Wænöinengä, ante pemonte emongantapa. Waodāni nāni wænte ongöñömö awēnē tömengä miñæ tee empo pongantapa. Wængongui Codotedo pönö cæcā beyænque tömēna inguipoga quēwēnāni inānite adinque mēnaa go mēnaa iñönānite adocanque ingante wænöninque ayæ wadāni mēnaa go mēnaa iñönānite adocanque ingante wænöninque nangui ināni inānite nē wænöna badatapa. Tömēna pancadāniya inānite yaēmenca nē wænöna badatapa. Ayæ tömēna godö cæda beyænque waodāni pancadāniya gue ænente nāni wænguimāmo pō wæncædānimpa. Ayæ tömēna godö cæda beyænque pancadāniya quingæ wodonte nāni wænguimāmo pō wæncædānimpa. Ayæ tömēna godö cæda beyænque pancadāniya

babæidi wænönäni beyæ wæncædänimpa.

⁹ Ayæ Wængongui Codotedo wæætë tee bædedinta wataa wi æmpoyongante botö, Wængongui qui, ante nāni wëmonca iya täimoga ænömengadæ inö waodāni önöwocaidi owodāni atabopa. Mäninäni Wængongui nänö angainö ante nē ēñente cædāni inte, Itota mönö Codito inongä ingampa, ante, Nö ante impa, ante apænedāni beyæ tömēnāni inānite wænönāni wængaināni inānitapa. ¹⁰ Adodāni yedæ äninque iimaï änānitapa, “Awēnē Wængongui bitö tömänāni inānite nē Aabi inömi imipa. Edæ tæiyæ waemö inömi inte bitö nē nö ante apænebi imipa. İninque inguipoga quëwēnāni mönitö imönite nē wænöninäni inānite æiquedö apænte anguimii. Ayæ mönitö wepæ möni gowepæ beyæ ante tömēnāni inānite æiquedö panguimii ämönipa.” ¹¹ Mäninäni tömänāni inānite tömengä doyæncoo näämæntacoo pönongä ænānitapa. Æñönānite, “Wædænque ayæ ee ongödäni,” äninque tömengä, “Minitö iminite do wænönāni wæmīni bai wadāni mīni tönīñadāni ayæ mīināni quëwēnāni inte mīnitö tönö Wængongui ingante nē cædönāni inānite wænoncædänimpa. İinäni inānite wænunguēnēnāni inānipa, ante Wængongui nänö änö bai tömēnāni inānite iinque nāni wænonganca ee ongödäni,” ämopa, ante angantapa.

¹² Ayæ Wængongui Codotedo wæætë tee bædedinta wataa wi æmpoyongä atabopa. Mänīñedē tæimö goinque ocæ ocæ gotimpa. Waodāni tömēnāni guiidengä wængä ate wæwente beyænque wentamoncoo mongænāni bai nænque

iñontobæ adobaï wentamö pönï emö batimpa. Apäicä pæibo iñedē incæ wepæ bai opatawæ emö batimpa. ¹³ Ayæ nēmoncoo öönæde inö owocoo iñömö wææ tæ ayæ waa wææ tæ ayæ waa wææ tæ inguipoga iñömö tæ wææningue iigowæmö ayæ icadāmaï iñonte nanguï woboyæ pæmæñonte woga woga cædinque tæ wæænte bai adobaï tæ wæænänitapa. ¹⁴ Ayæ öönæ incæ mincayonta dadi ompote bai dæ ä batimpa. Ayæ tömanquidi tömäa wää tēiwænē iñontobæ wayömö gote dæ ä bai inimpa.

¹⁵ Ayæ awënë odeyeidi incæ ñænænäni inte nē cædönäni incæ tontadoidi awënëidi incæ nē nanguï eadäni incæ tæi piñænte cædäni incæ tömënäni guiñente badänitapa. Ayæ awënë nē godonte æningä beyænque nē cæte quëwënäni incæ nämanque cæte quëwënäni incæ tömënäni tömänäni guiñente badänitapa. Guiñente badinque tömënäni änanquidi æite ontatodē iñömö wē womönänitapa. Ayæ onquiyaboga dicabocodē tæcæguedē go guiite wē womönänitapa. ¹⁶ Ayæ waodäni inänite aa pete bai tömënäni, “Onquiyaboidi eñeedäni, dicaboidi eñeedäni, Awënë tæ containpaa nē tæ contadongä mönitö imönite adāmaï incæcäimpa, ante cædinque minitö mönitonga tæ wæænte beocaedäni,” ante aa pedänitapa. Ayæ, “Wængonguï Codotedo ænguï badinque mönitö imönite pänāmaï incæcäimpa, ante cædinque tæ wæænte beocaedäni,” ante aa pedänitapa. ¹⁷ “Edæ tömëna nāna nanguï pönï ænguï baquïönæ do ba iningue æcänö ayæ quëwenguingää. Edæ dæ ä inguïnö anguënē,” ante wædänitapa.

7

Wængongui anquedo nänö nē yewæmöinäni

¹ Ayæ ate Wængongui anquedoidi mënaa go mënaa ongönäni atabopa. Adocanque yædæcapæ inö ongöñongante wacä yæwainö ongöñongante wacä imatæ betamonca inö ongöñongante tömangä æmataæ betamonca inö a ongongantapa. İninque, Woboyæ mëa go mëa iñonte mönö a ongönö inö inguipoga go pæmænämaï, ante cædinque cædänitapa. Tömänäni ömaa iñömö incæ gäwapæntibæ iñömö incæ adobai tömäo awæncoo pæyömö incæ woboyæ pæmænämaï ingæimpa, ante cædänitapa. ² Wacä anquedo nænque tamönö inö pongä atabopa. Tömengä Wængongui nē Quëwengaingä nänö yewæmöingö næænte pongä atabopa. Wængongui anquedoidi mënaa go mënaa inäni iñömö inguipoga incæ gäwapæntibæ incæ wo ewente cæcædänimpa, ante cædinque Wængongui godö cæcä beyænque tæi piñænäni badänitapa. Mäninäni inänite Wængongui anquedo ñowo pöningä yedæ aa pecantapa. ³ “Ee ongödäni. Edæ minitö inguipoga incæ gäwapæntibæ incæ awæncoo incæ ee wo ewenämaï iñöminite mönitö Wængongui ingante nē cædäni näni önönemö inö tömengä nänö yewæmöi ante täno yewæmoncæmönimpa. Yewæmömöni ate minitö mäniñedë ate wo ewente cædäni.”

⁴ Ayæ yewæmöinäni æpodänidö badänitapa, ante apænecä ëñentabopa. Tömänäni yewæmöinäni inte tiento coadenta i coatodo müido ganca inänitapa. Idægoidi näni cabo tipæmpoga go mencabodäniya iñönänite iïmaï yewæmöinäni badänitapa.

5 Wëenëñedë Oodaa wodi pæināni nāni cabo iñönānite nē yewæmōināni iñömō tipæmpoga go mēa mīido ganca inānitapa.

Ayæ Odobeë wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Gado wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

6 Ayæ Atedo wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Nempatadii wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Mānatee wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

7 Ayæ Tīmeönö wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Debii wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Itacado wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

8 Ayæ Tabodöo wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ Ootee wodi pæināni nāni cabo iñönānite nē yewæmōināni wææ tipæmpoga go mēa mīido ganca inānitapa.

Ayæ adobaï Beencaminö wodi pæināni nāni cabo
iñönānite nē yewæmōināni wææ tipæmpoga
go mēa mīdo ganca inānitapa.

Tæiyænāni näämæntacoo mongænte a ongöninque

⁹ Ayæ ate wæætē ayömō tæiyænāni ināni a
ongönāni atabopa. Æpodānidō ināni, ante æcānō
tee mampote anguingā. Mānināni wabæca
nāni quēwencabo wabæca nāni quēwencabo inte
tæiyænāni incæ waodāni nāni cabo waodāni nāni
cabo inte tæiyænāni incæ wacā awēnē nāni cabo
wacā awēnē nāni cabo inte tæiyænāni incæ wadō
nāni tedecabo wadō nāni tedecabo inte tæiyænāni
incæ mănōmaï inönāni inte ongönānitapa. Iināni
iñömō näämænta weocoo doyæncoo mongænāni
inte yædēmæmāa önönempo nææninque Awēnē
nānō aacæ tæ containpa gäänē ongöninque
Wængonguï Codotedo weca a ongönānitapa. ¹⁰ Ayæ
tömēnāni yedæ äninque iïmaï änānitapa.

“Mönō Wængonguï iñömō tömengä nänō aacæ tæ
containpaa nē tæ contacā inongä inte
tömengä adocä mönō imonte, Quēwencæminimpa,
ante nē Ængä inongä ingampa.

Ayæ Wængonguï Codotedo adobaï mönō imonte,
Quēwencæminimpa, ante nē Ængä inongä
ingampa,” änānitapa.

¹¹ Nē aadāni nē Picænāni tönō mēa go mēa
mīnāni quēwēnāni Awēnē tæ containpa
gäänē ongöñönānite Wængonguï anquedoidi
tömānāni iñömō yabæ inō godāmæ ongönānitapa.
Wængonguï nänō aacæ tæ contayömō gäänē
guidömēmæ ædæ wææninque tömēnāni
Wængonguï ingante, Bitö Wængonguï Awēnē imidö

anguënë, ante watapæ apænedänitapa. ¹² Ayæ änänitapa.

“Amëë. Mönö Wængongui ingante watapæ apænemönipa.

Ayæ tömengä ñäö ëmongänö anguënë. Tömengä tömänö ante ëñëngä ingänö anguënë.

Tömengä ingante waa adinque mönitö tömengä ingante waa ate pönente apænemönipa.

Ayæ tömengä tæi piñængä ingänö anguënë.

Tömengä tæi piñængä inte tömää nänö cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mänömaï baquinö anguënë, ante, Amëë,” änänitapa.

¹³ Ayæ në aadäni në Picænäni incæ adocanque botö imo äninque, “Iinäni näämæntacoo doyæncoo në mongænäni iñömö æmönänidö inänitawo. Edæ ædönö quëwëninäni inte pönänitawo,” angantapa.

¹⁴ Äñongante botö tömengä ingante, “Awënë bitö tömëmi do ëñëmipa,” antabopa. Äñömote tömengä wæætë, “Mäninäni nanguï näni wæwengaimämo iinque baganca incæ ayæ miinäni quëwënäni inänipa. Edæ tömënäni weocoo doyæncoo, Waëmö pönï bacæimpa, ante Wængongui Codotedo wepænë yamongainäni inänipa,” ante në aacä në Picængä apænecantapa.

¹⁵ Ayæ adocä godömenque apænecantapa.

“Mänömaï beyæ Wængongui nänö aacæ tæ contaimpa gäänë a ongöninge tömënäni

itædē incæ woyowotæ incæ Wængongui oncö
tæiyæ waemö oncönē tömengä ingante cöwē
cædänipa.

Īninque oncontai bai tömēnāni wænömēnæca wo
cæcä bai cædinque mänimpaa nē tæ conta-
dongä iñömö

tömēnāni inänite ante wææ aacæcäimpa.

¹⁶ Tömēnāni cöwē gue ænēnāmaï tepæ gæwænāmaï
incædänimpa.

Nænque tömēnāniya ti nāwānāmaï i ĩninque
tömēnāni gōnāmaï incædänimpa.

Quiēmē ocoi ä beyænque tömēnāni gonte ināmaï
inguinānidō anguēnē.

¹⁷ Edæ Wængongui Codotedo Wængongui nänö
aacæ tæ contayömö gäänē nē a ongongä
iñömö

tömengä iñömö mänināni näämæntacoo nē
mongænāni inänite nē aacä incæcäimpa.

Tömengä edæ tömēnāni inänite quēwenguimæ
tapæñömö iñömö ænte mäocä goquināni.

Ayæ Wængongui tömēnāni wēñapæ nāni tamonte
wædi tömāmæ wadæ cæmoncæcäimpa,” an-
gantapa.

8

Tee bædedinta tömanta wi æmpocampa

¹ Ayæ Wængongui Codotedo tee bædedinta
tömanta wi æmpoyongante öönædē iñömö mēedia
ooda ganca nōwæ ongonte batimpa. ² Ayæ
anquedoidi önompo æmæmpoque go mēa ganca
ināni Wængongui weca nē a ongōnāni inänite
atabopa. Mänināni inänite tömengä todompeta
nāni ancade önompo æmæmpoque go mencadea

ganca pædæ godongä ænänitapa. ³ Ayæ wacä anquedo iñömö ogui waaquï iya täincade oodo inte nani badöincade nææninque, Wængongui quï, ante nani iya täimpa gäänë ponte a ongongantapa. Mänimpa oodo inte nani badöimpa Wængongui nänö aacæ tæ contaimpa gäänë ongönimpa. Ayæ, Wængongui quinäni tömengä ingante apæneyönäni bitö ogui waaquï tancæbiimpa, ante cædinque adocä anquedo ingante wacä pöninque nanguï ogui waaquï godongä ængantapa. ⁴ Ænte önompo næænte ogui waaquï iya tangä iñinque tæmämämo Wængongui weca æipämoyedë Wængongui quinäni tömengä ingante nani apænepämo guëa adoyömö æipämotimpa. ⁵ Ayæ adocä anquedo iñömö ogui waaquï iya täincade æninque iya täimoga gonga ænte eyede wëninque inguipoga iñömö wææntodongantapa. Wææntodongä ate detæbo tæi tæi tæ goyö yedæ pönï änimpa. Yædæ yædæ näinimpa. Ayæ goinque gotimpa.

Todompeta nani ancade

⁶ Ayæ Wængongui anquedoidi önompo æmæmpoque go mäa ganca inäni todompeta nani ancade önompo æmæmpoque go mencadea ganca në nææinäni inte todompeta önöne gö cædedinque we we öoncæ cædänitapa.

⁷ Wængongui anquedo tänocä iñömö tömengä todompeta inte we we öongä ate yoguica gonga tönö wepæ adoyömö wempodente bai inguipoga iñömö tæ tæ wæænimpa. Tæ tæ wææ ate inguipoga iñömö pancabaa nanguï ömæ iñömö gonte batimpa. Awæncoo iñömö pancacooga

incæ adobaï nanguï incoo gonte wænimpä.
Gaguimæncoo iñömö tömancoo gonte batimpa.

⁸ Wængonguï anquedo ayængä iñömö tömengä todompeta inte we we öongä ate ñænæ onquiyabo emö bai gonga bæcodote bai iñonte wææntodönäni gäwapæntibaa tæi tæi guitimpa. Tæi tæi guï ate gäwapæntibæ iñömö pancatibaa incæ nanguï pöni æpæ iñömö wepæ batimpa. ⁹ Ayæ gäwapæntibæ cæncadëmæ inö quëwënäni iñömö pancadäniya incæ nanguï inäni wænänitapa. Ayæ ñænæ wipocoo pancacooga incæ nanguï wo cæwodincoo iñömö wo ewente guitimpa.

¹⁰ Wængonguï anquedo ayængä iñömö tömengä todompeta inte we we öongä ate ñænæ nëmö iñömö cadentato tica wodönote bai öönæde inö owodëmö incæ tæ wææninqe önoncooga iñömö pancacooga incæ nanguï æpænë iñömö tæi tæi guitimpa. Æpæ tayömö adobaï cæncadëmæ inö tæi tæi guitimpa ¹¹ Mäninëmö emöwo iñömö, Ti Nänëmö, ante näni änëmö impa. Nëmö tæi guiyonte nanguï æpæ iñömö moncapæ bai ti nämæ batimpa. Waodäni tæiyænäni iñömö imæ ti nämæ bagaimæ bete wænänitapa.

¹² Wængonguï anquedo ayængä iñömö tömengä todompeta inte we we öongä ate nænque pancayömonga tente ba ate apäicä adobaï pancayömonga tente ba adinque näna apäidinö iñömö pancaa wëmö batimpa. Nëmöncoo iñömö pancadäniya incæ nanguï inäni wo ewente badäni ate näni apäidinö iñömö pancaa wëmö batimpa. Itæde iñonte tipæmpoga go mæa ooda ganca iñö mæa go mæa ooda ganca nænque ñäö apäidämaï inimpa. Ayæ woyowotæ iñonte tipæmpoga go mæa

ooda ganca iñö mäa go mäa ooda ganca apäicä
tönö nēmoncoo apäidämaï inänitapa.

¹³ Ayæ ayömote guingämöwæ öönæde gämænö
pao pao godinque iïmaï ante aa pecä ëñentabopa.
“Inguipoga quëwënäni nāni wæquinque. Nāni
wæquinque. Nāni wæquinque impa, angantapa.
Edæ Wængonguï anquedoidi mënaa go adocanque
ināni inte tömënāni todompeta inte we we öoncæ
cædāni beyænque inguipoga quëwënäni iñömö
nanguï pönï wæwenguïnāni bacædānimpa,” ante gu-
ingämöwæ angantapa.

9

¹ Wængonguï anquedo ayængä iñömö tömengä
todompeta inte we we öongä ate wa nēmö öönæde
inö owodinque inguipoga tæ wæængäinēmö ongö
atabopa. Māniï nēmö ingante tadömengadænguipo
ontatodë wi ænequï godonte inimpa. ² Wi
ænequï æninque ontatodë wi ænecä ate
tëëmancoo ta æitimpa. Māniï tëëmancoo ñænæ
gongapamö tëëmancoo bai inimpa. Inique iï
tëëmancoo tadömengadænguipo ontatodë ta æiyonte
nænque tönö öönæ wentamö pönï badaimpa.
³ Tëëmancodë inö ñāwāi ta pöninque inguipoga
iñömö wææñönānite wacä godö cæcä beyænque
tömënāni tæimö badinque emëñe inguipoga
quëwënäni bai tæ guidāni badānitapa. ⁴ Ayæ
tömënāni inānite, Inguipoga gaguimæncoo
incæ gæpæñabocoo incæ awæncoo incæ pæcoo
wo ëwënāmaï iedāni. Wæætë waodānique
önönemö inö Wængonguï nänö yewæmöi inte nē
yewæmönāmaï ingaināni inānite adinque mīnitö
tömënāni inānite godö cæmīni beyænque nantate

wæcæðänimpa, ante wacä angantapa. ⁵ Ayæ ñäwäiidi inänite edæ, Wænöedäni, änämaï ingä inte tömengä, Minitö wæætë tömënäni inänite önompo æmæmpoque apäicä ganca cæmïni beyæ nanguï pöni wæwencæðänimpa, angantapa. Ìinque emëñe tæ gui waocä nantate wæcä bai tömënäni nanguï pöni nantate wæwënäni inänitapa.

⁶ Mänïñedë waodäni, Æbänö cæte wænguïmoo, ante ancaa cædinque wænämaï incæðänimpa. Wæinëmönipa, ante änäni incæte ædö cæte wæmainäni.

⁷ Ayæ ñäwäiidi iñömö tontadoidi cabayoidi guëadö guëa cæte në godäni bai adobai emönänitapa. Tömënäni ocaboga awënë poganta oodo inte badöninta bai wencadänitapa. Ayæ mäninäni awinca iñömö waodäni awinca bai emönänitapa. ⁸ Tömënäni ocaguï iñömö onquiyængä ocaguï bai encadinque tömënäni bagacoo iñömö nëöö бага bai engadänitapa.

⁹ Tömënäni tæcætawë inö tæineta inte badöinta bai wææ mongænänitapa. Ayæ tontadoidi guëadö guëa wænoncæte ante cædinque änäni ate cabayoidi pogodo gote awoto bai wëä pönonte nanguï pöni ä bai ñäwäiidi iñömö adobai önonguënepæ pao pao godinque ämæ godänitapa. ¹⁰ Tömënäni önömiñæ incæ emëñe önömiñæmpa bai emiñænänitapa. Tömënäni nani tæi piñæmämo önömiñæ inö emiñænäni inte önompo æmæmpoque apäicä ganca godö cæðäni beyæ waodäni nanguï pöni wæwënänitapa.

¹¹ Mänï ñäwäiidi iñömö awënë odeye ingante ëñente quëwënänitapa. Mäningä tömënäni awënë iñömö tadömengadænguipo iñömö quëwënäni

inänite nē aacä anquedo inongä inte tömengä emöwo ebedeo tededö, Abadoö, nāni äwo i ayæ, Nē Wo Ewengä, ante emongä ininque guidiego tededö, Apodiö, ante pemönänipa.

¹² Täno nāni wæquinque do iinque batimpa. Incæte godömenque mempoga ganca nangui pōni nāni wæquinque ayæ baquinö angüenē.

¹³ Wængongui anquedo ayængä iñömö tömengä todompeta inte we we öongä ate tedepämo tēñö eñentabopa. Ogui waqui iya täimpa oodo inte badöimpa Wængongui weca mä ongompa. Mänimoga önömoncawæ bai mä go mä mä ongöñömö mäniñömö tedepämo tēñö eñentabopa.

¹⁴ Wængongui anquedo ayængä todompeta nē næængä ingante iima angantapa. “Nænæ ononga Eopadatedö nāni änonga iñömö anquedoidi mänaa go mänaa ināni iñömö nē ñä cæyænināni inänite bitö ñimpo cæe,” angantapa. ¹⁵ Edæ mänināni anquedoidi mänaa go mänaa ināni iñömö tömēnāni mäninēpo iinque ba ate manii apäicä iñonte mänionæ incæ manii ooda iñonte dobæ nāni cæquinque ante a ongöñönänite iima angantapa. Waodāni tömānāni iñömö mencabodāniya go adocabodānique quēwēñönāni adocabodānique inänite minitö wænoncæminimpa, angantapa. Ayæ ñowo tömēnāni inänite ñimpo cæcä ate tömēnāni wænoncæte ante tao godānitapa. ¹⁶ Ayæ tontadoidi iñömö cabayo mongæināni ināni æpodānidö ināni, ante tee mampote dootiento miñöo ganca inānitapa. Mänimpodāni inānipa, ante eñentabopa.

¹⁷ Botö wiimonte bai ayömo cabayoidi tönö nē mongæināni iñömö iima emönāni atabopa. Cabayo nē mongæināni iñömö tæcætawē inö tæineta nāni

wææ mongæntacoo pancataa opatawæ gonga gonte bai ëmontapa. Pancataa wentamö ëmontapa. Pancataa atopode nani ä bai wiñadæ ëmö bai ëmontapa. Cabayoidi ocabo iñömö nëöo ocabo bai encadänitapa. Tömënäni önöne inö gonga tönö täämä tönö atopode nani öo waadö tadedänitapa. ¹⁸ Mänii gonga tönö täämä tönö atopode iñömö mämämoque go adopämoque nani wænömämocoo në tadedäni inte cabayoidi iñömö waodäni tömänäni mencabodäniya go adocabodänique quëwëñönäni adocabodänique inänite wænönäni wænänitapa. ¹⁹ Mäninäni cabayoidi tömänäni önöne inte tæi piñænte wænöninque adobai tömänäni önömiñæ inte tæi piñænte wænönänipa. Edæ tömänäni önömiñæ iñömö tæntæ ocabo bai ëmiñænäni inte waodäni inänite pocænäni wænänitapa.

²⁰ Mänimämo wodonte nani wængäimämocoo beyæ ayæ wænämaï quëwënäni inte wæwënäni incæte tömänäni nani wënæ wënæ cægainö ante, Ancaa wæwente awædö, ante pönänämaï inäni inte ñimpo cädämaï inänitapa. Wæætë oodo inte padata inte bodonte inte dica inte awæmpa inte tömänäni nani badonte cönönincoo iñömö adämaï incoo incæte ëñänämaï incoo incæte dao dao godämaï incoo incæte tömänäni, Mönitö wængonguïdi inänipa, ante ædæ wæænte apænedinque ñimpo cädämaï inänitapa. Ayæ adobai wënæidi inänite ædæ wææninque, Minitö mönitö wængonguïdi iminidö angüënë, ante ñimpo cädämaï inte apænedänitapa. ²¹ Ayæ mäninäni godömenque waodäni inänite püinte wænönäni inte tömänäni müi bete yewænäni inänipa. Nänöogægä inämaï

iñongante towente cædonäni inte tömënäni awëmö ö æñäni inänipa. Mänömaï godömenque cædinque tömënäni nani wënæ wënæ cægainö ante, Ancaa wæwente awædö, ante pönënämaï inäni inte ñimpo cædämaï inänitapa.

10

Wængonguï anquedo dadi ompointa guiyanta næængä

¹ Ayæ wacä anquedo nē tæi emongä inte öönædē inö wæængä atabopa. Tömengä weocoo mongænte bai boguimancodē pöninge tömengä ocaboga tæcædæca inö daimē godämæ owotapa. Tömengä awinca incæ nænque bai apäidine tömengä önömënë incæ cobacadewæ gonga gonte emö bai emënegä ingantapa. ² Tömengä önönempo inö dadi ompointa ininta nani wi æmpodinta guiyanta næængä ingantapa. Tömengä önöwa tömëwa gäwapæntibaa cö cæwadinque tömengä dipæwa guiquënë ömaa cö cæwacantapa. ³ Mänömaï cö cæwadinque tömengä nëöö ii pepa bai nanguï pöni yedæ aa pecantapa. Aa peyongä detæbo önompo æmæmpoque go mæa ganca wæætē tæi tēninge tededänitapa. ⁴ Detæbo önompo æmæmpoque go mæa ganca inäni iñömö tededäni eñëninge botö yewæmoncæ cætabopa. Tæcæ yewæmoncæ cæyömo öönædē inö tedepämo iïmaï ante tedecä eñëntabopa. “Iñæmpa önompo æmæmpoque go mæa detæbo nani tededö æbänö ante tededäni, ante wii eñenguï i inique bitö yewæmönämaï ie,” angantapa.

⁵ Wængonguï anquedo botö adingä iñömö gäwapæntibaa tönö ömaa nē a ongongä iñömö

tömengä önompo tömempo öönädē inö pædæ æmpocantapa. ⁶ Tömengä tömempo pædæ æmpodique, Wængongui ēñēñongä botö änö ante nöingä baquinö anguēnē, ante iimaï angantapa. Edæ nē wantæpiyæ cōwē quēwengaingä inte öönädē tömää inguipoga tömää gāwapæntibæ tömää badöningue tömengä adobai öönädē owodäni tömänäni inguipoga quēwēnāni tömänäni gāwapāa quingänö owodäni tömänäni inānite nē badongaingä inte tömengä emōwo apænedique, Botö apænedö nöingä baquinö anguēnē, ante nē apæneca iñömö, “Mönö ee ongöñedē do iinque batimpa, angantapa. ⁷ Edæ Wængongui anquedo tömangä pönī iñömö tömengä todompeta we we öoncæ cæyongante Wængongui nänö cæinēnö ante wē wodonte bai nänö angainö ante ñöwo iinque cæcæcäimpa. Wængongui ingante nē cægaināni tömengä beyæ nē apænegaināni iñönānite mäninö nänö cæinēnö ante do apænegaingä inte Wængongui mäninö bai ñöwo iinque cæcæcäimpa,” angantapa.

⁸ Ayæ öönädē inö tedepämo adopämo do botö ēñēnö ñöwo wæætē botö imote iimaï angä ēñentabopa. “Wængongui anquedo nē gāwapæntibaa tönö ömaa iñömö a ongongä weca godingue bitö tömengä önönempo dadi ompointa ininta nāni wi æmpodinta nänö nææininta æe,” angantapa. ⁹ Angä ēñēningue Wængongui anquedo weca godingue botö tömengä ingante, Dadi ompointa guiyanta pönömi æmoe, ante añömo tömengä wæætē botö imo, “Æe. Æeningue cæe. Bitö önöne da wēneyömi guiñēmæ bai waème pönī ingæimpa. Incæte yo mongænte ate cæncadē guiddingue ti nä

bacæimpa. Ìninqe cædente wæcæbiimpa,” angä ëñentabopa.

¹⁰ Wængongui anquedo önönempo dadi ompointa guiyanta æninque botö ade cæntabopa. Önöne guïñëmæ bai waëme pönï i incæte yo mongænte ate cæncadë guïdinqe ti nä badinqe cædente wætabopa. ¹¹ Ayæ botö imote angantapa. “Wacä awënë nãni cabo wacä awënë nãni cabo incæ wabæca nãni quëwencabo wabæca nãni quëwencabo incæ wadö nãni tedecabo wadö nãni tedecabo incæ wabæca wabæca nãni awënë odeye cabo iñönånite bitö, Mäninãni inånite æbänö baquïi, ante wæætë Wængongui beyæ apæñecæbiimpa,” ante angantapa.

11

Wængongui æbänö cæcää, ante mënaa apænedapa

¹ Wacä botö imote, Tee manguimpa impa, ante cæwipa bai pædæ pönöninge ayæ botö imote, “Goe, angantapa. Wængongui oncö tæiyæ waëmö oncönë godinqe mänincö tönö, Wængongui quï, ante nãni iya täimpa tee mäe. Ayæ waodäni adoyömö ædæ wææninge Wængongui ingante, Bitö Wængongui Awënë imidö anguënë, ante watapæ apænedäni iñömö æpodänidö inãni, ante tee mampote cæe. ² Wængongui oncö tæiyæ waëmö oncönë tee mäninqe yacö boyäa iñömö tee mänämaï ie. Edæ mänincö boyäa wadäni oodeoidi inämaï inãni inånite do godonte intapa. Mäninãni edæ coadenta i doo apäicä ganca mänimpoga iñonte Wængongui nänö tæiyæ waëmö quëwëñömö incæ wo ëwente cæcædänimpa. ³ Ayæ botö imotedö ante,

Botö æbänö cæboo, ante nē, Nö ante impa, ante apæneda iñönte botö godö cæquimo beyænque tömëna tæi piñænte badinque müido dootiento tetenta eönæ mänimpoönæ iñonte botö beyæ apænecædaimpa. Waodäni wæwente beyænque gömæ emoncoo mongænäni bai tömëna adobai gömæ emoncoo mongæninque apænecædaimpa,” ante apænecä eñentabopa.

⁴ Wængongui æbänö cæcää, ante nē, Nö ante impa, ante apæneda iñömö tömëna iñömö Wængongui inguipoga Awënë iñongante tömengä weca odibowæ nani äwæ mēwäa ongöwæ bai inapa. Ayæ tömengä weca yædo concædi ti wodönoincade mencadea ongoncade bai mänina iñömö adobai inöna inapa. ⁵ Wadäni, Tömëna inate wænæ wænæ cæinēmopa, ante cædäni ininque tömëna wæætē nē piinte cædäni inänite gonga wo tadete bai cædinque wænöna wæncædänimpa. Edæ, Tömëna inate wænæ wænæ cæinēmönipa, ante nē cædäni tömänäni mänömai wæncædänimpa. ⁶ Wængongui godö cæcä beyænque tömëna tæi piñæna badinque, Wængongui beyæ möna apæneyedē cöönæ cædämai ingæimpa, ante cædinque öönæde tee mönete bai cæcædaimpa. Ayæ tæi piñæna inöna inte tömëna æyedēmē cæinëna incæ wæætē wæætē cæyönate æpæncoo tömancoo wepænque bacæimpa. Adobai inguipoga tömämæ quëwänäni inänite tömëna cæda ate quiēmē wænömämocoo incæ pö wænæ wænæ bacædänimpa.

⁷ Ayæ tömëna, Wængongui æbänö cæcää, ante inque apæneda ate babæcä bai mönö guiñëngä inte tadömengadænguipo inö tadinque tömëna inate guëadö guëa cædinque tæi emongä

inte gänä cædinque wænongä wæncædaimpa. ⁸ Wæna ate tömëna baonque ñænængade nani quëwëñömö taadö iñömö öñoncædaimpa. Edæ Todömä iñömö quëwënäni wīwa cædäni bai ayæ Equitobæ quëwënäni wënæ wënæ cædäni bai mänii ñænængade nani quëwëñömö nē quëwënäni iñömö adobai wënæ wënæ cædänipa. Mänii quëwëñömö adoyömö tömëna Awënë ingante awäa timpote wænönäni wængacäimpa. ⁹ Mëönaa go adoönæque go tæcæ itæde iñonte tömëna baö ini acæte ante pöningue wacä awënë nani cabo wacä awënë nani cabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wabæca wabæca nani quëwencabo incæ waodäni nangui inäni ponte tömëna baö acædänimpa. Ayæ, Da wënämaï ingäimpa, ante wææ cæcædänimpa. ¹⁰ Tömëna iñömö Wængongui beyæ nē apænedina inöna inte ingui-poga quëwënäni inänite nangui äna wædinäni inte tömënäni ñöwo wæætë watapæ tocædänimpa. Ìningue tömëna mänömaï wænte öñöna ate tömënäni nangui Yæ yæ todinque wacä ingä wacä ingä, Önonque æe, ante pædæ godönäni æncædänimpa.

¹¹ Mëönaa go adoönæque go tæcæ itæde iinque go ate Wængongui edæ, Quëwencæmina, ante tömengä nänö guëmämämo quëwenguimämo woo öongacä ate tömëna iñömö wæætë miina badinque ængæ ganticædaimpa. Ængæ gantiyöna nē adäni guiquënë ancai guiñente wæcædänimpa. ¹² Ancai guiñente ayönäni tömëna öönæde inö tedepämo yedæ ante ëñencædaimpa. “Iñömö pö æeda,” angä ëñëningue tömëna öönæde inö boguimancodë æiyöna tömëna inate nē piinte cædinäni edonque

acædänimpa. ¹³ Tömëna æiyedë mänïñedë goinque nanguï ocæ ocæ goquimpa. Tömënäni nāni quëwëñömö onconcoo bacoo iñonte pancaconga incæ nanguï onconcoo acapowate bogocæ tæ gowæænguimpa. Ado goinque goyedë waodāni tiæte miido ganca wæncædänimpa. Ayæ miināni quëwënāni ancai guiñëninque, Wængonguï öönædë nē quëwëmi imi inte bitö nö tæi piñænte imidö anguënë, ante wæcædänimpa.

¹⁴ Ayæ mempoga nāni wæquinque do iinque batimpa. Incæte godömenque adopoque nanguï pöni nāni wæquinque oo pöni bacæimpa.

Todompeta æmæwoya

¹⁵ Wængonguï anquedo tömangä iñömö tömengä todompeta we we öongä ate öönædë inö wadāni nāni tedepāmo yedæ tededinque iimaï änānitapa.

“Mönö Awënë Wængonguï tömengä Codito tönö inguipoga Tæiyæ Awënë Odeyeda badinque wantæpiyæ cöwë aacædaimpa,” änānitapa.

¹⁶ Nē aadāni nē Picænāni iñömö bæinticoatodo ganca ināni mänimpodāni iñömö Wængonguï weca tömënāni awënë tæ contaimpaa nē tæ contadāni inte ñöwo guidömëmæ ædæ wææninque Wængonguï ingante, Bitö Awënë Wængonguï imidö anguënë, ante watapæ apænedänitapa. ¹⁷ Ayæ iimaï apænedinque,

“Awënë Wængonguï bitö adobique Tömää nē
Cædömi inte
wëenëñedë do nē quëwengaimi imi ñöwobi inömi
ïmipa.

Bitö nämä tæi piñæmi inte ñöwo ædæmö nē aabi
inömi imipa,

ante adinque bitö ïmite waa ate pönente
apænemönipa.

18 Wabæca wabæca nāni quëwencabo incæ
tömānāni quëwēnāni ænguī badānitapa.

Ayæ bitö ænguī babi ïninqe

nē wængaināni ïnānite bitö apænte panguiönæ do
batimpa.

Ayæ bitö beyæ nē apænedönāni ïñömö bitö ïmite
nē cædönāni ïñönānite

tömēnāni ïnānite bitö, Minitö cædi beyæ paga
cæbo æncæminimpa, ante bitö godonguiönæ
dobæ batimpa.

Ayæ bitö quīnāni ïñönānite bitö ëmowo ante bitö
ïmite nē ëñente cædönāni ïñönānite

awēnē bai ïnāni incæ önönānique ïnāni incæ
tömānāni ïnānite bitö, Minitö cædi beyæ
paga cæbo æncæminimpa, ante bitö
godonguiönæ dobæ batimpa.

Ayæ inguipoga quëwēnāni ïnānite wadāni nē wo
ëwente cædönāni ïñönānite bitö wo ëwente
cæquiönæ do batimpa.”

19 Ayæ öönæde ïnö Wængongui tæiyæ waëmö
oncö odemö wibænetapa. Wibæneyö Wængongui,
Waadāni æbānö cæte botö tönö godongāmæ waa
cæte quëwencædanimpa, ante odömoncæte ante
nänö yewæmongainca nāni da wencaincade
ïñömö mänincönē mæ ongoncade atabopa.
Ayömote yædæ yædæ nāinimpa. Yedæ pönī ānimpa.
Detæbo tæi tæi tēñö yedæ pönī ānimpa. Goinque
gotimpa. Ayæ yoguica cöönæ bai nanguī cæte
wæænimpa.

12

Onquiyængä tönö dadagöö nani änonngä

¹ Wængonguï, Mä pönï odömömo adinque ëñencädänimpa, ante cædinque öönädë inö waëmö pönï badongä a owo atabopa. Edæ onquiyængä iñömö nænque inte weocoo wëñate bai mongæñongä apäicämo incæ tömengä cæncadëwa ænömengadæwa inö impa. Tömengä, Awënë poganta, ante tipæmpoga go mëa nëmöidi inte godämæ badöinta wencacantapa. ² Mäningä onquiyængä yädëmadä ënengä iñongante wëñængä ëñacæ cæcä wæte wædinque wëñæ nantate Yæ yæ wæcantapa.

³ İinque Yæ yæ wæyongante öönädë inö mä pönï Wængonguï nänö badöi wadö bai badöi a owo atabopa. Edæ ñænængade obe bai dadagöö nani änonngä opatawæ ëñacä inte tömengä ocabocoo önonmpo æmæmpoque go mencaa encacä inte mänii ocabocooga awënë pogantacoo önonmpo æmæmpoque go mentaa wencacä ingantapa. Tömengä önonmoncawæ adobai önonmpo tipæmpoga ocabocooga encacä ingantapa.

⁴ Tömengä önoncaimiñænca picæ cæmiñæninque öönädë owodäni nëmöidi incæ pancadäniya incæ nanguï inäni inänite wææntodongä inguipoga tæ wæænänitapa. Onquiyængä oo pönï iñongante dadagöö, Wëñængä ëñacä ate cæncæboimpa, ante tömengä weca a ongongantapa.

⁵ Onquiyængä wëñængä onguïñængä ingante mangä İinque tömengä iñömö nänö Awënë baquinque pæcantapa. Tömengä iñömö tæiyæ awënë tömengä nempo quëwënäni inänite aacä

baï adobaï tömämæ quëwënäni inänite, ïïmaï cæedäni, ante aacæcäimpa. Mäningä onquiyängä wëñängä ingante wacä ö ænte Wængonguï weca ayæ tömengä nänö aacæ tæ contayömö mäniñömö ænte mæicä æicantapa. ⁶ Mäninö bayonte wäänä iñömö önömæca iñömö wodii gocantapa. Tömengä beyæ ante Wængonguï nänö eyepæ cæyömö mäniñömö wodii gocantapa. Mäniñömö müido dootiento tetenta ëönæ mänimpoönæ iñonte tömengä quëwente beyæ cænguï eyepæ pönönäni cæncæcäimpa, ante Wængonguï tömengä nänö owoyömö ante do badongantapa.

⁷ Mäniñedë edæ öönädë iñömö guëadö guëa cæte wænönänitapa. Wængonguï anquedo Miiguedo näni angaingä iñömö tömengä wadäni anquedoidi awënë inongä ingampa. Tömengä tömënäni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæatedö wæætë guëa cædäni incæte ⁸ tömënäni ædö cæte gänä cæquinänii. Edæ ædö cæte öönädë iñömö ayæ quëwenguinänii, ante tömënäni inänite wido cædänitapa. ⁹ Tömënäni iñömö ñænængade dadagöö ingante wido cæte wææntodönänitapa. Mäningä dadagöö iñömö wëenëñedë tæntæ ingaingä inte tömengä ëmowo Wënæ Tatäna mëwoga ëmongä ingampa. Adocä, Inguipoga quëwënäni tömänäni oda cæcædänimpa, ante në wapiticæ ænte mäocä ingampa. Tömengä ingante ayæ tömengä anquedoidi inänite inguipoga iñömö wido cæte wææntodönänitapa.

¹⁰ Ayæ ate öönädë inö tedepämo yedæ ante iïmaï ä ëñentabopa.

“Ñöwoönæ mönö Wængongui mönö imonte,
Minitö botö æmæwo æmo beyænque
quëwenguimïni, ante tömengä nänö cæönæ
batimpa.

Ayæ tömengä nänö tæi piñænö ñöwoönæ ba inique
tömengä adobai Tæiyæ Awënë Odeye ñöwoönæ
bacäimpa.

Ayæ tömengä nänö apænte ængaingä mönö Codito
adobai nämä tæi piñængongä inte në angä
bacäimpa.

Wænæ guiquënë mönö tönïñadäni inänitedö ante,
Wænæ wænæ cädänidö angüënë, ante
wapiticæ apænete änewëngongä ingampa.

Woyowotæ incæ itädë incæ mönö Wængongui
weca a ongöningue
tömengä mäninäni inänitedö ante në wapiticæ
änewëngongä iñongante tömengä ingante
inguiyoga iñömö wææntodönäni
wæængantapa.

11 Wængongui Codotedo wepæ tömengä nänö
wænte godongaïmæ beyænque tæi ëmönäni
badinque

mönö tönïñadäni iñömö wænæ ingante gänä
cädänitapa.

Ayæ, Wængongui æbänö cæcää, ante tömënäni nani
apænedö beyænque tömënäni tæi ëmönäni
badinque wænæ ingante gänä cädänitapa.

Wädäni tömënäni inänite Wængongui beyæ
wænoncæ cæyönäni tömënäni,

Mönitö guiñänämaï wæncæmönimpa, ante në änäni
inänitapa.

12 Mänömaï beyæ minitö öönädë iñömö në
quëwëmïni inte watapæ tocæminimpa.

Wamini guiquenë inguipoga iñömö æpæntibæde
iñömö nē quēwemini inte mini wæquinque
ingæimpa.

Edæ wænæ minitö weca wææ pö quēwengäimpa.

Tömengä nänö wo ewenguinö oo pöni impa, ante
ēñente beyænque äingä pöni bacampa.

Mänömaï beyæ minitö guiñenguimämo baquinque
impa.”

Mänömaï ante yedæ angä ēñentabopa.

¹³ Ayæ dadagöö, Botö imote inguipoga
iñömö wido cæte wææntodönäni adi wædö,
ante wædinque onquiyängä ingante wēñängä
onguiñängä nē mäningä ingante bæi ongoncæte
ante togængantapa. ¹⁴ Incæte Wængongui,

Önömæca iñömö bitö beyæ botö cæyömö pao
pao gocæbiimpa, ante cædinque ñænængade
guingämowæ önguēnepæ bai tipænguēnepäa
pönö badongä enguēnepænte bai onquiyängä
bacantapa. Inique onquiyängä, Tæntæ botö
imote bæi ongönämaï incæcäimpa, ante Wængongui
önömæca tömengä beyæ nänö cæyömö pao pao
gocantapa. Mëa go adoque tæcæ wadepo iñonte
tömengä mäniñömö quēwente beyæ nänö cængui
eyepæ ænte cænguiñömö gocantapa. ¹⁵ Ayæ,

Onquiyängä ingante æpæ quingæ mangui bai
bæ ta tæi guicæcäimpa, ante cædinque dadagöö
tömengä önöne inö önö bai æpæ towæ tadonte
bai tao godecantapa. ¹⁶ Dadagöö towæ tadonte
bai nänö tao godepæ quingæ pönö onguipo
incæ onquiyängä beyæ ante cædinque wi ænete
cæyö ada guiipæntapa. ¹⁷ Ada guiipæ adinque
dadagöö iñömö onquiyängä ingante godömenque

ænguï badinque wadæ godinque, Mäningä onquiyængä wënäni incæ wadäni inänite guëa cæte wænonguïmo, ante gocantapa. Tömënäni Wængonguï nänö, İïmai cæedäni, ante wææ angainö ante nē ēñente quëwënäni inte, Itota æbänö cæcää, ante nē apænete quëwënäni inönäni iñömö mäninäni mäningä onquiyængä wënäni iñönänite dadagöö, Wænoncæboïmpa, ante gocantapa.

13

Mënaa mönö guiñënöna

¹ Ayæ dadagöö æpæntibæ yæwedeca ëmönaiya iñömö ponte a ongongantapa.

Ayæ babæcä bai nē guiñënogä iñömö æpæntibædë quëwente ta pöñongä atabopa. Mönö guiñënogä tömengä ocabocoo önompo æmæmpoque go mencaa encacä inte tömengä önömoncawæ önompo tipæmpoga ocabocooga inö encacä ingantapa. Awënë pogantacoo tipæmpoga ganca tömengä önömoncawäa da da wencate encacantapa. Ayæ Wængonguï ëmöwo incæ wiwa babæ wapiticæ ante äniwoi tömengä ocabocooga tömancooga inö yewæmonte encacä ingantapa. ² Mäningä mönö guiñënogä botö nē adingä iñömö mëñe bai ëmönongä incæte tömengä önöwa oto önöwa bai ëwacä inte tömengä önöne nëöö önöne bai ënecä atabopa. Ayæ dadagöö nämä nänö tæi piñænö ante mönö guiñënogä ingante pædæ godöninge tömengä nänö aacæ tæ contaimpa pædæ godongä ænte tæ contadinque mönö guiñönongä nē awënë badinque, İïmai

cæedäni, ante nanguï angä bacantapa. ³ Ayæ mönö guïñënogä adoque ocaboga ämocate wæncæ cæcä bai ingaingä incæte gämæ cæcate ingantapa.

Tömämæ quëwënäni mönö guïñënogä ingante adinque ancai guïñëninque tömänäni tömengä miñæ godänitapa. ⁴ Dadagöö godö cæcä beyænque mönö guïñënogä iñömö awënë badinque dadagöö bai në angä do bacä impa, ante adinque tömänäni dadagöö ingante, Bitö Awënë Wængonguï bai imidö anguënë, ante apænedänitapa. Adobai mönö guïñënogä ingante, Bitö Awënë Wængonguï bai imidö anguënë, ante apænedänitapa töö. Mäninö ante godömenque iïmai äninque, “Æcänö mönö guïñënogä bai ingä iñömö edæ dæ angampa. Æcänö tömengä ingante guëadö guëa cædinque tæi ëmonte gänä cæquiringä.”

⁵ Dadagöö godö cæcä beyænque mönö guïñënogä iñömö nämanque pömente änewënogä badinque Wængonguï ingantedö ante babæ wapiticæ ante änewëninque, Botö Wængonguï bai imopa cæminii, änewënogantapa. Ayæ awënë badinque në angä badingä inte mönö guïñënogä iñömö coadenta i doo apäicäa mänimoga iñonte, iïmai cæedäni, ante aacantapa. ⁶ Ayæ tömengä mäniñedë Wængonguï ingantedö ante wënæ wënæ babæ wapiticæ ante änewënogä inte Wængonguï ëmowo ante tömengä nänö quëwëñömö ante babæ wapiticæ ante änewënogantapa. Tömänäni öönädë në quëwënäni inänitedö ante adobai babæ wapiticæ ante änewënogantapa. ⁷ Tömengä Wængonguï quinäni inänite guëadö guëa cæcæcäimpa, ante cædinque dadagöö godö

cäcä beyænque tömengä nämä tæi piñængä badinque tömënäni inänite tæi emongä inte gänä cæcantapa. Ayæ dadagöö godö cæcä beyænque mönö guiñëongä iñömö waodäni nani cabo waodäni nani cabo incæ wacä awënë nani cabo wacä awënë nani cabo incæ wadö nani tedecabo wadö nani tedecabo incæ wabæca nani quëwencabo wabæca nani quëwencabo iñönänite tömengä tömänäni awënë badinque tömënäni inänite, İimai cæedäni, ante nê angä bacantapa.

⁸ Mänömaï beyæ tömämæ quëwënäni iñömö tömengä ingante, Bitö Awënë Wængongui bai imidö anguënë, ante apænecædänimpa. Wængongui inguipoga nänö badöñedë, Botö Codotedo ingante do wænönäni wæncæcäimpa, ante do angacäimpa. İingä Codotedo, Nani quëwenguinta, ante nänö yewæmongaintaa ædänidö emowo yewæmönämaï inäni iñömö tömënänique mönö guiñëongä ingante, Bitö Awënë Wængongui bai imidö anguënë, ante apænecædänimpa.

⁹ Nê ëamonca imini inte ëñëedäni.

¹⁰ “Æcämenque ingante ante apænedinque Wængongui, Ao bæi ongonte tee mönete bai cæedäni, angä ininque tömengä ingante do bæi ongonte tee mönecædänimpa.

Æcämenque ingante ante apænedinque Wængongui, Ao yaëmenca wænömöni wæncæcäimpa, angä ininque tömengä ingante do yaëmenca wænönäni wæncæcäimpa.”

Mänömaï beyæ minitö Wængongui quimöni iñömö wæntæye inämaï inte ee cæcæminimpa.

Edæ tömengä ingante godömenque wede pönencæminimpa.

¹¹ Ayæ ate wacä babæcä bai në guiñenongä guiquênë onguipodë quëwente ta pöñongä atabopa. Codotedoidi önömoncawæ mēwāa nāni ēmoncadö bai tömengä adobai encacä ingantapa. Incæte tömengä dadagöö bai tedecantapa.

¹² Mönö guiñenongä tänocä pöningä nänö änö beyænque ayængä pöningä iñömö awënë badinque tänocä beyænque äninque, İimaï cæedäni, ante në aacä ingantapa. Tānocä pöningä mönö guiñenongä ämocate beyæ në wæncæ cæcä incæ wæætë gämæ cæcadingä iñongante ayængä pöningä iñömö tömämæ quëwēnāni inānite angä ēñēninque tömānāni tänocä pöningä ingante, Bitö Awënë Wængongui bai imidö angüenë, ante apænedānitapa. ¹³ Māningä mönö guiñenongä ayængä pöningä, Mā pönī cæbo adinque ēñencædānimpa, ante cædinque badongampa. Ayæ godömenque mā pönī cæcä beyænque waodāni edonque pönī ayönāni öönædë inö incæ gonga inguipoga wææ adānitapa.

¹⁴ Mönö guiñenongä tänocä pöningä nänö änö beyænque tömengä weca mā cædinque ayængä pöningä iñömö tömämæ quëwēnāni inānite oda cæte nāni goquïnö ante mäocä godānitapa. Edæ tömēnāni inānite äninque, Mönö guiñenongä yaēmenca guiiyömö wæætë gämæ cæcate në mīingä quëwengä nänö emönö bai adobai badöedāni, angä ēñente badonte concædānitapa. ¹⁵ Mönö guiñenongä ayængä pöningä iñömö eyepæ cædinque mönö guiñenongä tänocä pöningä nänö

ëmönö bai nani badöinca incæ, Tedecæcäimpa, ante cæcä ate mäninca incæ oo guëmangantapa. Tömënäni nani badöinca ante waodäni Baa äninque, Bitö Awënë Wængongui bai imidö anguënë, ante apænedämaï inäni inänite mäninca incæ ä beyænque wænönäni wænänitapa.

¹⁶ Ayæ awënëidi bai inäni incæ önönänique incæ mäincoo eadäni incæ mäincoo ömæpodäni incæ wacä godonte æningä beyænque në cæte quëwënëni incæ nämanque cæte quëwënëni incæ mäninäni tömänäni inänite tömengä nänö änö beyænque önompo tömempo inö yewæmöinäni badänitapa. Wæætë önompo tömempo inö yewæmönämaï inäni inte tömënäni önönemö inö yewæmöinäni badänitapa. ¹⁷ Tömengä nänö yewæmöi yewæmönämaï inäni guiquënë tömënäni mäincoo ædö cæte godonte ænguïnänii. Ædö cæte godonte ænäni weca gote tömënäni mäincoo inï godonte ænguïnänii. Ayæ mäninö ante yewæmöi inönmö mönö guinönongä tänocä pöningä ëmowo impa. Wii tömengä ëmowo yewæmonte i bai tömengä ëmowo ante beyæ, Æpodö i, ante yewæmonte impa.

¹⁸ Mäninö ante ëñencæte ante nani ëñenö ante eyepæ encadäni inte ëñencædänimpa. Ocai në encacä ininque, Mönö guinönongä tänocä pöningä nänö, Æpodö i, ante ëñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

14

144.000 ganca inäni nani ämotamini äinö

1 Ayæ botö ayömete Wængongui Codotedo änanquidi iñömö Tiöno nani anquidi mäniñömö a ongongä atabopa. Tömengä weca waodäni tiento coadenta i coatodo müido ganca inäni inte Wængongui Codotedo emöwo adobaï tömengä Mæmpo Wængongui emöwo nani önönemö inö nē yewæmöinäni inte a ongönäni atabopa. 2 Ayæ botö eññömöte öönæde inö tedepämo ante ñænæ tēñabo ante baï detæbo eyequei tē baï eññenque adobaï waodäni nani adapate nani ampoque inte tæiyænäni ampyönäni ante baï tedepämo tē eññentabopa. 3 Tiento coadenta i coatodo müido ganca inäni iñömö mä äninque waa ämotamini ante änanitapa. Wængongui nänö aacæ tæ containpa gäänē ämotamini äñönäni miñäni quëwënäni mäa go mäa ganca inäni nē aadäni nē Picænäni tönö eññänitapa. Tiento coadenta i coatodo müido ganca inäni inguipoga quëwënäni tönö adoyömö quëwëñönäni, Godonte æmo beyænque quëwenguimini, ante Wængongui nänö nē æninänique i ämotamini äinö ante eññente ancædänimpa. Wadäni guiquënë ædö cæte eññente anguinäni.

4 Iinäni iñömö Wængongui ingante ante waemö quëwencæmönimpa, ante cædinque, Onquiyængä, ante nē towënämaï ingainäni inänipa. Iinque tömënäni Wængongui Codotedo ædönö gocä tömengä miñæ cöwë godänipa. Tömënäni waodäni tönö adoyömö quëwëñönäni Itota, Botö wepæ beyænque quëwenguimini, ante tömënäni inänite ængacäimpa. Täno amiña bayedē tä pedinque minitö, Wængongui qui baquimpa, ante mini

cönöni bai mäninäni adobai Wængongui quinäni badinque Wængongui Codotedo quinäni inänipa. ⁵ Adodäni cöwë babæ änämaï inäni ininque wadäni ædö cæte tömënäni inänitedö ante, Babæ änänipa, ante anguïnänii. Tömënäni edæ cöwë wënæ wënæ cædämaï inänipa töö.

Wængongui anquedoidi mēnaa go adocanque nāni änö

⁶ Ayæ Wængongui anquedo wacä iñömö öönæde inö pö pao pao gocä atabopa. Inguipoga nē quëwënäni inänite wabæca nāni quëwencabo wabæca nāni quëwencabo incæ waodäni nāni cabo waodäni nāni cabo incæ wadö nāni tedecabo wadö nāni tedecabo incæ wacä awënë nāni cabo wacä awënë nāni cabo iñönänite anquedo tömänäni inänite Wængongui wantæpiyæ cöwë nänö watapæ apænedö ante eñencædänimpa, ante apæ necæte ante pongantapa. ⁷ Mäningä Wængongui anquedo iñömö yedæ iïmaï äninque, “Wængongui apænte nänö anguïönæ do inque bayonte mäniönæ tömämini mini cægäinö ante tömengä apænte ancæcäimpa. Ininque tömengä ingante guiñëninque ee aedäni. Adobai tömengä ingante waa aedäni. Tömengä edæ öönæde incæ inguipoga incæ æpæntibæ incæ æpæ tayömö incæ tömäa nē badongaingä ingante minitö, Bitö Awënë Wængongui imidö anguënë, ante ædæ wææninque watapæ apæneedäni. Mäninque ämopa,” angantapa.

⁸ Mäningä Wængongui anquedo gocä ate wacä Wængongui anquedo ayængä pöninque iïmaï angantapa. “Babidönia nāni äñömö do wo ewente batimpa. Babidönia nāni waëmö quëwëñömö

i incæte do wo ewente ba aedäni. Mäniñömö nē quēwēnāni wēnæ wēnæ cædināni iñömö on-quiyængä nē towengä bai cædinque biinömæ bete quidi quidi dowæninque towencædänimpa, ante ti nāmæ godonte bai cædänipa. Tömēnāni mänömaï godö cædäni beyænque wabæca nāni quēwencabo wabæca nāni quēwencabo wæætē wēnæ wēnæ cædänitapa. Mäninque ämopa,” angantapa.

⁹⁻¹⁰ Ayæ mäningä Wængongui anquedo gocä ate wacä Wængongui anquedo tömängä pöningue yedæ iïmaï angantapa. “Mönö guiñenongä tänocä pöningä ingante æcänö, Bitö Awēnē Wængongui bai imidö anguēnē, ante apænecää. Ayæ tömengä nänö emönö bai nāni badöninca gäänē ædæ wææninque æcänö apænecää. Wængongui tömēnāni inänite nanguï piincæcäimpa. Tömēnāni önompo incæ önonemö incæ mönö guiñenongä nänö yewæmöi nē yewæmöināni adinque Wængongui adobai tömēnāni inänite nanguï piincæcäimpa.” Äninque Wængongui anquedo godömenque apænecantapa. “Mänināni Wængongui biinömæ nänö piimæ becædänimpa. Mänimænque æninque tömengä nänö piinte owætadē pe ñiñængantapa. Mänimænque nē bete bai ināni iñömö nanguï pöni wæwencædänimpa. Wængongui tæiyæ waemö anquedoidi weca ayæ Wængongui Codotedo weca gonga bæcoyömö atopode nāni öö wadö gonga bæcoyömö öö wayömö mäniñömö iināni æmæwo gonte ba bai nanguï wæwencædänimpa,” angantapa.

¹¹ “Ayæ tömēnāni gonga bæcoyömö mäniñömö wæwēñönāni nāni wæwēmāmo tēemä bai cōwē æicöompa. Woyowotæ incæ itädē incæ mänināni

edæ guëmänämaï incædänimpa. Tömënäni iñömö, Mönö guiñenongä tänocä pöningä weca ædæ wææninqe, Bitö Awënë Wængongui bai imidö anguënë, ante nē apænedäni inänipa. Ayæ tömengä nänö emönö nāni badöninca gäänē ædæ wææninqe nē apænedäni adobai tömengä emöwo nänö yewæmöi nē yewæmöinäni inte mäninäni tömänäni wantæpiyæ mänömaï guëmänämaï inte wæwencædänimpa. Mäninqe ämopa,” angantapa.

¹² Mänömaï beyæ mñitö Wængongui quimñini iñömö tömengä nänö, iïmaï cædäni, ante nänö wææ angainö ante eñente cædömini inte ayæ Itota ingante godömenque wede pönemñini inte mñitö wæntæye inämaï inte ee cæcæmñinimpa.

¹³ Ayæ ate botö öönæde inö tedepämo iïmaï ante eñentabopa. “Bitö iïmaï yewæmöe,” angantapa. “Ñöwo ganca ayæ ate Awënë Itota ingante pönente nē wænänäni inte tömënäni nāni toquinque.”

Ante añongä Wængongui Tæiyæ Waëmö Önöwoca, “Ao ämopa, angampa. Nāni toquinque ingæimpa. Tömënäni nāni nanguï cægainö ñimpo cæte guëmancædänimpa. Edæ tömënäni nāni waa cægainö öönæde iñömö edonque pönï acæimpa,” ante angantapa.

Inguipoga quëwënëni beyæ amiña bai baccæimpa

¹⁴ Ayæ botö ayömo näämænta boguimä mä owo atabopa. Adocanque Waocä eñagaingä ingä bai iñömö mänii boguimäa tæ contacä atabopa. Tömengä ocaboga awënë poganta oodo inte badöinta encacä inte tömengä nänö önönempo yaëmē bai waingamē idämæ engamē næængä atabopa. ¹⁵ Ayæ ate wacä anquedo

Wængongui oncö tæiyæ waëmö oncönë ta pöningue boguimäa nê tæ contacä ingante iïmaï yedæ ante aa pecantapa. “Inguipoga quëwënäni botö imote nê wede pönente waa cædönäni iïñömö nê minte pæmö bai inäni inte tömënäni näni to amiña bayedë bai impa. Wadæ wadæ pïnöningue näni ö æñedë bai do bayonte bitö yaëmë bai bitö nææï ænte gote mäninäni inänite wadæ wadæ pinonte bai cædinque ö æe.” ¹⁶ Angä ëñëningue boguimäa nê tæ contacä gote inguipoga iïñömö tömengä yaëmë bai nänö nææï inte wadæ wadæ pinonte bai cædinque tömänäni nê minte pæmö bai inäni inänite ö ængantapa.

¹⁷ Ayæ öönædë iïñömö Wængongui oncö tæiyæ waëmö oncönë ongonte ta pöningue wacä anquedo adobai yaëmë bai waingamë idämæ engamë næænte pongantapa. ¹⁸ Tömengä pongä ate Wængongui anquedo wacä pongantapa. Wængongui oncö tæiyæ waëmö oncönë, Wængongui qui, ante iya tæe, ante nê änongä inte näni iya täimoga gäänë ongöningue ta pöningue yaëmë bai waingamë idämæ nê engamë næængä ingante iïmaï yedæ apæncantapa. “Inguipoga tömäo nê wënæ wënæ cædäni iïñömö yowecoo bai inänipa. Mäninäni yowe ite bayedë bai inäni adinque bitö yaëmë bai bitö nææï ænte gote yowecoo wangö tadampote gæte bai cædinque tömënäni inänite cæe.”

¹⁹ Angä ëñëningue Wængongui anquedo inguipoga iïñömö tömengä yaëmë bai nänö nææï inte wangö tadampote cædinque yowecoo gædäni bai tömengä nê wënæ wënæ cædäni inänite adobai cæcantapa. Ayæ yowepæ ante ñænængade

näni pīnä pīnä gāwate cæincadedē yowecoo wææntodonte bai cædinque tōmengä wēnæ wēnæ cædāni inānite Wængonguī pīinte nänö pāiñömö wido cæcantapa. ²⁰ Māniī tōmēnāni yowecoo ænte pīnä pīnä gāwate cæincade iñömö tōmēnāni nāni quēwēñömö yabæca ongompa. Māniñömö tōmēnāni inānite pīnä pīnä gāwate bai cædānitapa. Cæyönāni tōmēnāni wepæ nanguī pōni gotimpa. Cabayo goto wīnediñömö æi ganca tōmēnāni wepæ māninganca æi godinque todee tiento quidōmetodo ganca māninganca nanguī pōni wepæ gotimpa.

15

Ticete ganca nāni wæwenguimāmo pompa

¹ Ayæ botö ayömote Wængonguī ñowo wæætē mā pōni odömömo adinque eñencædānimpa, ante cædinque öönædē inö bamönengæ pōni badongä a owo atabopa. Wængonguī anquedoidi önompo æmæmpoque go mēnaa ināni iñömö öönædē ongöñönānite tōmēnāni inānite, Mīnitö cæmīni beyænque waodāni nāni wæwenguimāmocoo önompo æmæmpoque go mempoga pongæimpa, angä eñente ænte pönānitapa. Māniī wæwēmāmocoo æmæwo ba adinque Wængonguī nänö ænguī panguimāmo eyepæ bapa.

² Ayæ æpæntibæ iñömö awocawænta emö bai adinque botö mānintibæ tönö gonga guëa wempodente bæco atabopa. Adotibæ yæwedeca waodāni mæ ongönānipa. Mānināni iñömö mönö guiñenongä ayæ pōningä ingante ante ayæ tōmengä nänö emönö bai nāni badöinca

ante Baa äninque tömënäni tæi emonte gänä cädäni inänitapa. Adodäni tömengä emöwo ante, Æpodö i, ante Baa ante yewæmönämaï inäni atabopa. Wængongui tömënäni inänite adapate nani ampoqui godongä ænte næænte a ongönänipa. ³ Tömënäni a ongöninge Wængongui ingante në cægaingä Möitee wodi ämotamini nänö angainö ante ayæ Wængongui Codotedo ämotamini nänö againö ante iïmaï ämotamini änänipa.

“Awënë Wængongui bitö adobique Tömää Cægaïmi inte

bitö mä cädö iñömö waëmö pöni inönö anguënë. Bitö tömämæ quëwënäni Tæiyæ Awënë Odeyebi imidö anguënë.

Quiëmë cædinque bitö në nö cæbi imipa.

⁴ Awënë eñëmi, Æcämë bitö imite guiñënämaï inguingää.

Ayæ bitö emöwo ante pönente æcämë waa adämaï inguingää.

Edæ bitö adobique tæiyæ waëmö imipa.

Tömää bitö nö cædinö edonque pöni ba adinque wabæca wabæca nani quëwencabo tömänäni bitö weca ponte ædæ wæænninge

bitö imi, Bitö Awënë Wængongui imidö anguënë, ante ancädänimpa.”

⁵ Ayæ ate botö ayömote öönæde iñömö Wængongui tæiyæ waëmö oncö incæ æmontaicö bai inte tömengä nänö nänënë owocö iñömö wi ænete bayö atabopa. ⁶ Wængongui anquedoidi önompo æmæmpoque go mënaa inäni mänincönë ongonte ta pönänitapa. Tömënäni cädäni ate waodäni nani wæwenguimämo iñömö önompo æmæmpoque go mempoga pongæimpa. Tömënäni

weocoo waëmoncoo nïno nïni ancoo ñäö bai
ëmoncoo mongænïni inïnipa. Tömënïni tæcætawë
inö pacadeyænta oodo inte nïni badöinta
mongæënëmæïnïni inïnipa.

⁷ Ayæ mïinïni quëwënïni mënaa go mënaa
iñönïni adocanque Wængonguï anquedoidi
önompo æmæmpoque go mënaa inïni iñönïnite
owætacoo adotaque adotaque pædæ godongä
ænïnitapa. Mänintacoo önompo æmæmpoque go
mentacoo iñömö oodo inte nïni badöintacoo inte
Wængonguï në wantæpiyæ cöwë quëwengaingä
ingä nänö ænguï pämämo eyede ënentapa.
⁸ Wængonguï nänö ñäö apäidö beyæ ayæ tömengä
nänö tæi pïñæmämo beyæ tömengä tæiyæ
waëmö oncönë iñömö tëmämämo eyede mä
ongompa. Ayæ Wængonguï anquedoidi önompo
æmæmpoque go mënaa inïni cædäni ate waodäni
nïni wæwenguimämo ante önompo æmæmpoque go
mempoga nïni wæwenguinganca iinque baganca
æcämenque incæ Wængonguï tæiyæ waëmö oncönë
guidämaï incædänimpa.

16

Wængonguï nänö ænguï panguintacoo

¹ Ayæ ate Wængonguï tæiyæ waëmö oncönë inö
tedepämo yedæ tē ëñentabopa. Në angä iñömö
Wængonguï anquedoidi önompo æmæmpoque go
mënaa inïni inïnite, “Goedäni, äninque, Wængonguï
owætacoo nänö ænguï panguintacoo önompo
æmæmpoque go mëa ganca incoo næænte gote
ingui-poga iñömö gao cæedäni,” angä ëñentabopa.

² Wængonguï anquedo tänocä godinque tömengä
owætadë ënë incæ ingui-poga gao cæcantapa. Gao

cäcä ate mönö guiñëongä ayæ pöningä nänö yewæmöi në yewæmöinäni inte tömengä nänö ëmönö bai näni badöninca gäänë ædæ wææninque apænedäni iñönänite tömënäni ayaa nantai ñömæi tömäo baadinque nantate wæðänitapa.

³ Wængonguï anquedo ayæ në gocä tömengä owætadë ënë incæ æpæntibæ cæncadëmæ gao cæcä ate mänimæ iñömö do wæninäni wepæ bai bayonte mänintibædë quëwënäni tömänäni wænänitapa töö.

⁴ Wængonguï anquedo ayæ në gocä tömengä owætadë ënë incæ æpænë tömänonga gao cædinque æpæ tayömö tömänömö gao cæcä ate mänimæ tömämæ wepæ batimpa. ⁵ Ayæ ate Wængonguï anquedo æpæ tömämæ beyæ në angä inte iïmaï apæncä ëñentabopa.

“Mönö Tæiyæ Waëmö inömi ëñëmi, bitö wëenëñedë do në quëwengäimi iïmi ñöwobi adobi inömi iïmipa.

Mänömaï tömënäni inänite apænte ante päninque bitö nö cædinque apænte pänimi iïmipa.

⁶ Edæ bitö quinäni tönö bitö beyæ në apænegainäni inänite wænönäni ate tömënäni në wænäni wepæ näate bagadänimpa. Bitö wæætë në wænonte näate badäni näni cægai beyæ

wepæ godömi begadänimpa,” angantapa.

⁷ Ayæ Wængonguï qui, ante näni iya täimoga inö tedepämo të ëñentabopa. “Ao ämopa. Awënë Wængonguï bitö adobique Tömää Cægäimi inte, iïmaï pancæboimpa, ante bitö apænte angainö bai cædinque tömënäni inänite päninque bitö cöwë nö cæte waa päimipa.”

8 Wængonguï anquedo ayæ nē gocä tömengä owætadē ēnē incæ nænque mæ owoyömö mänñömö gao cæcantapa. Ayæ waodäni æmontaiya montæ gongate wæcædänimpa, ante cædinque nē godö angä beyænque nænque nanguï tī nāwä batimpa. 9 Mänii nanguï tī nāwante beyæ waodäni montæ gongate badäni incæte tömēnāni nāni wēnæ wēnæ cædinö ante, Ancaa wæwente awædö, ante ayæ pönēnāmaï ināni inte ñimpo cædāmaï inte Wængonguï ingante waa adāmaï inānitapa. Tömēnāni, Wængonguï cæcä beyænque mönö wæwēmämocoo pönimpa, ante wædinque Wængonguï ingante piinique tömengä emöwo ante wēnæ wēnæ babæ ante tedewēnānitapa.

10 Wængonguï anquedo ayæ nē gocä tömengä owætadē ēnē incæ mönö guññēnongä tänocä pöningä nänö aacæ tæ containpaa gao cæcä ate tömengä awēnē odeye inongä inte nänö aayömö mæ māmante bai batimpa. Waodäni nantate wædinque önonguēnēwa æo pocænguēnēwate wædānitapa. 11 Mänömaï wædäni incæte tömēnāni nāni wēnæ wēnæ cædinö ante, Ancaa wæwente awædö, ante godömenque pönēnāmaï ināni inte ñimpo cædāmaï inānitapa. Wæætē nantai baate nantate wædinque Wængonguï öönædē quēwēnongä ingante piinte badinque wēnæ wēnæ babæ ante tedewēnānitapa.

12 Wængonguï anquedo ayæ nē gocä tömengä owætadē ēnē incæ ñænæ önonga Eopadatedö nāni änonga mäninonga gao cæcä ate awēnē odeyēidi nænque tamönö quēwente nāni ponguïnö taadö ante önö tömäo amimö batimpa.

13 Ayæ wēnæidi wentamö nāni ewocacabo mēnaa

go adocanque inäni iñömö weque bai inäni ta pönäni atabopa. Dadagöö önönē inö adocanque wənæ ta pongantapa. Mönö guiñenongä tänocä pöningä önönē inö wacä wənæ ta pongantapa. Ayæ Wængongui beyæ nē apænedömo imopa, ante nē babæ apænedongä önönē inö wacä wənæ pongantapa. ¹⁴ Mäninäni wənæidi önöwocaidi inäni inte mä cädäni inänipa. Iinäni iñömö tömämæ awënë odeyeidi weca añecæ godinque tömənäni inänite apænedinque, Awënë Wængongui adocanque Tömää nē Cægaingä inte nänö apænte anguiönæ iñonte minitö godongämæ ponte guëadö guëa cæcæminimpa, ante cädänipa.

¹⁵ “Mönö Awënë nämä incæ iimaï angantapa. Aedäni. Nē awëmö ængä iñontobæ pongä bai botö adobai änämaï inte poncæboimpa. Æyedönö ponguingä, ante nē mönämaï ongongä iñömö tömengä wänö cönongä bai inongä inte nänö toquinque. Edæ tömengä, Ömaabo inämaï incæboimpa, ante ayæ, Guiñëñate wädämaï incæboimpa, ante tömengä weocoo tömë weca ee mangä inongä ingampa,” angantapa.

¹⁶ Mänii wənæidi önöwocaidi tömämæ awënë odeyeidi inänite añecæ gote änäni eñëninque awënë odeyeidi iñömö tömənäni tontadoidi tönö Adämaguedoö ebedeo tededö nani añömö adoyömö godongämæ pönänitapa.

¹⁷ Ayæ Wængongui anquedo tömangä nē gocä tömengä owætadë enē incæ woboyæ owoyömö mäniiñömö gao cæcä ate öönädë inö Wængongui tæiyæ waëmö oncönë tömengä nänö aacæ tæ con-tayömö mäniiñömö tedepämo yedæ tededinque,

“Nöwo iinque batimpa,” angantapa.

¹⁸ Ayæ ate yædæ yædæ näinimpa. Detæbo tæi tæi tē goyö yedæ pönī äanima. Ayæ goinque nanguī pönī ocæ ocæ gotimpa. Waodäni ingui-poga näni quëwenganca tömanganca mänii goinque bai wa goinque cōwë godāmaī inimpa. ¹⁹ Goinque ocæ ocæ goyonte tōmēnāni näni ñænæ quëwēñōmō incæ tænguimæ tænguimæ godinque mēñōmōnga go adoyōmonque batimpa. Ayæ wabæca näni quëwencabo wabæca näni quëwencabo incæ tōmāo näni quëwēñōmō onconcoo acapowate bogocæ tæ gowæænimpa. Wængonguī adobaī, Babidōnia näni waēmō quëwēñōmō quëwēnāni wēnæ wēnæ cædānīpa, ante pōnente wædinque ænguī badinque, Mīni wæwenguinque impa, ante owæta biinōmæ nänö pīimæ eyede ēnē godonte bai cædinque tōmēnāni inānite nanguī pīinque pangantapa. ²⁰ Tōmāā wāā tēiwænē iñōmō yogæ guitimpa. Ayæ onquiyabocoo adobaī dæ bibitapæ batimpa. ²¹ Ayæ öönædē inö yoguica cōönæ bai waodāniya tæi tæi wæænimpa. Māinca tæi tæi wæænīnca adocaque incæ wodo tiēē diboda tee mā ganca enca impa. Yoguica wēnæ wēnæ incapa, ante adinque waodāni, Māinca mōnō wēnæ wēnæ wæwēmāmo impa, äinque Wængonguī ingante pīinte badinque wēnæ wēnæ babæ ante tedewēnānitapa.

17

Onquiyængä mäincoo beyæ nē towente quëwēnongä

1 Wængonguï anquedoidi önompo æmæmpoque go mēa ganca ināni önompo æmæmpoque go mēa ganca owætacoo nē næænāni iñönānite adocanque botö weca ponte, “Pöe, angantapa. Onquiyængä mäincoo beyæ nē towente quëwëngä iñömö æpæncoo yædopāa nē tæ contacä apænte nänö panguinö ante botö odömömo acæbiimpa.

2 Inguipoga awënë odeyeidi incæ tömengä tönö towengadänimpa. Waodäni inguipoga quëwënäni incæ adobaï tömengä towëinënö beyæ tömengä biinömæ bete baï quidi quidi dowænte baï pönënamäi cægadänimpa,” ante apænecä ëñentabopa.

3 Wængonguï Önöwoca incæ botonga pö guiiyongä botö wiimonte baï iimaï atabopa. Wængonguï anquedo adocä iñömö botö imote ö ænte mäo önömæca iñömö cönongä ongontabopa. Mäniñömö ongöninge botö onquiyængä babæcä baï nē guiñëngäa mongænte a ongongä atabopa.

Mäningä mönö guiñëngä opatawæ ëñadongä inte ëmowocoo tömengä baonga godämæ tömengä yewæmöi ëñacä ingantapa. Mäniwocoo Wængonguï ingantedö ante wënæ wënæ babæ wapiticæ äniwocoo inönimpa. Mäningä mönö guiñëngä nänö ocabocoo önompo æmæmpoque go mēa encacä inte tömengä nänö önömoncawæncoo önompo tipæmpoga ëmoncacä ingantapa. 4 Onquiyængä iñömö tömengä weocoo awënëidi waëmoncoo nāni mongæncoo tönö opatawæ ëmoncoo mongængantapa. Tömengä, Botö waëmö incæboimpa, ante oodo badöincoo tönö dicamö nāni nanguï godonte ænincoo tönö pededamö nāni ämö mäniimoncoo mongænte

ingantapa. Tömengä önönempo owætadē oodo inte badöintadē quimæmē baapæ bai i eyede engapæ næængantapa. Mäningä onquiyængä quiēmē nänö wænæ wænæ cæpāmo nänö towente quëwënö bai mänintadē næængantapa. ⁵ Adocä onquiyængä tömengä önönemö inö emöwo yewæmöi emongä ingantapa. Mäniwo wë wodonte bai i incæte iimaï ante impa.

“Babidönia nani waëmö quëwëñömö i incæte onquiyængä nē towengä bai impa.

Waadäni nē godö towënäni wäänä bai mäningä onquiyængä ingampa.

Ayæ adobai inguipoga quëwënäni wiwa nani cæinënö ante nē cædäni wäänä bai adocä onquiyængä ingampa.”

Mänömaï tömengä önönemö inö yewæmonte emongantapa. ⁶ Wængonguï quinäni ingainäni tönö Itota ingante ante apænedäni beyæ nē wængainäni tömënäni wepæ bete bai mäningä onquiyængä quidi quidi dowænte bai ingä botö atabopa. Tömengä ingante adinque botö ancai guiñente wætabopa.

⁷ Ancai guiñente wæyömote Wængonguï anquedo botö imote iimaï angantapa. “Quinante ancai guiñente wæbii. Mönö guiñëñongä iñömö tömengä ocabocoo önömpo æmæmpoque go mencaa encacä inte tömengä önömoncawæncoo önömpo tipæmpoga emoncacä inongä inte onquiyængä ingante nē mongængä ingampa. Onquiyængä ingante nē mongængä mönö guiñëñongä tönö onquiyængä tömëna nana wë wodonte ini æbänö i, ante apænebo ëñëe. ⁸ Adocä mönö guiñëñongä bitö adingä iñömö wëenëñedë quëwengaingä inte ñöwo

dæ angä incæte ayæ ate tadömengadænguipodë inö ææ ta poncæcäimpa. Ta pöningue tömengä nänö æmæwo ömäe ewenguinque ingæimpa. Wængongui, Quëwenguinta, ante inguipoga badönämaï iñedë nänö yewæmongaintaa inguipoga quëwënäni tömënäni ëmowo në yewæmönämaï inäni iñömö tömënäni iñömö mönö guiñënogä do quëwengaingä ñowo dæ angä incæte ayæ ate pongä adinque ancai guiñente wæcædänimpa,” ante Wængongui anquedo apænecantapa.

⁹ Ayæ tömengä wæætë apænecantapa. “Mäninö ante ëñencæte ante ocai ëñënö në encacä inte ëñencæcäimpa. Mönö guiñënogä tömengä önompo æmæmpoque go mäa ocabocoo iñömö önompo æmæmpoque go mäa änanquidi bai inänipa. Mänii änanquidiboga onquiyängä tæ contacä ingampa. Mänii ocabocoo adobai önompo æmæmpoque go mäa awënë odeyeidi bai inänipa. ¹⁰ Mänimpodäni iñönänite önompo æmæmpoque awënë odeyeidi inänite wido cædänitapa. Adocanque awënë odeye iñömö ñowo aacä ingampa. Wacä awënë odeye ayæ pönämaï ingä incæte tömengä pöningue wantæ iñö ongonte aacæcäimpa. ¹¹ Önompo æmæmpoque go mäa ganca awënë odeyeidi nani cabo iñönänite mönö guiñënogä adocä inongä incæte tömënäni beyæ ponguingä ingampa. Tömengä iñömö wëenëñedë në quëwengaingä incæ ñowo dæ angä inongä inte tömengä nänö æmæwo ömäe ewenguinque poncæcäimpa,” ante Wængongui anquedo apænecantapa.

¹² Ayæ tömengä wæætë apænecantapa. “Ayæ önompo tipæmpoga önömoncawæncoo bitö

adimoncawæncoo iñömö önompo tipæmpoga awënë odeyeidi bai inäni incæte ayæ aadamaï inänipa. Incæte ayæ ate tömënäni inänite änäni ate awënë odeyeidi badinque tömënäni, İimaï cæedäni, ante änäni bacædänimpa. Ayæ mönö guiñenongä tönö tömënäni adoque ooda ganca godongämæ aacædänimpa. ¹³ Tömënäni adodö ante pönënäni inte, Mönö tæi piñænö ante guiñenongä ingante godömö æncæcäimpa. Ayæ awënë odeyeidi inömö inte mönö, İimaï cæedäni, ante nē ämö imö bai mönö tömengä ingante ämö nē angä bacæcäimpa.

¹⁴ “Mäninäni Wængongui Codotedo ingante guädö guëa cæcædänimpa. Incæte tömengä iñömö awënëidi tömänäni Awënë inongä ingampa. Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. İinque tömengä tæi emönongä inte tömënäni inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedinque apænte nänö nē ængainäni inte tömengä miñæ cöwë ædæmö cæte tee empo godäni inänipa. Mäninäni adobaï tömengä tönö godongämæ guädö guëa cæte wænonguinäni inte tæi emonte gänä cæcædänimpa,” ante Wængongui anquedo apænecantapa.

¹⁵ Ayæ tömengä wæætë botö imote iimaï apænecantapa. “Onquiyængä mäincoo beyæ towente quëwënonngä inte æpæncoo yædopäa tæ contacä abitapa. Mänii æpæncoo iñömö tæiyænäni waodäni bai inänipa. Wabæca nani quëwencabo wabæca nani quëwencabo incæ wadö nani tedecabo wadö nani tedecabo incæ waodäni tæiyænäni inänipa. Mäninäni tömänäni mänii

æpæncoo bai inänipa. ¹⁶ Ayæ onompo tipæmpoga önömoncawæncoo bai awënë odeyeidi tönö mönö guiñenongä iñömö tömënäni bitö nē adināni inönāni inte onquiyængä maincoo beyæ nē towente quëwëngä ingante piincädänimpa. Piïninque, Tömengä ingante æmæwo ömæe ewengæimpa, ante cæcädänimpa. Tömengä maincoo tömancoo ö ænāni ate ömaacä inte wæyongante tömengä baö cæninque tömengä ingante æmæwo iya tancädänimpa. ¹⁷ Wængongui, Botö angai bai iinque baganca tömënäni botö pönönö ante cæcädänimpa, ante godö cæcä beyænque mänināni awënë odeyeidi nāni mimönē adodö ante pönënänipa. Pönëninque tömënäni godongämæ Ao äninque, Mönö guiñenongä aacæcäimpa, ante tömengä ingante, Mönö tæi piñænö ante godömö ænguingä, ante godönāni ængantapa.

¹⁸ “Mäningä onquiyængä bitö adingä bai Babidönia nāni waëmö quëwëñömö adobaï impa. Mäniñömö awënëidi iñömö tömämæ awënë odeyeidi inänite nē aadāni inänipa,” ante Wængongui anquedo apæncantapa.

18

Babidönia nāni quëwëñömö do wo ewente batimpa

¹ Ayæ ate Wængongui anquedo wacä inte öönädē inö wææ pongä atabopa. Tömengä tæi piñængä inte nanguï angä ingä inte nāmā nänö ñäö apäite emönö inte inguipoga iñömö ñäö apäicä atabopa. ² Tömengä nänö tedepämo inte iïmai yedæ aa pedinque,

“Babidönia nāni āñömö do wo ewente batimpa.
 Babidönia nāni waēmö quēwēñömö i incæte
 do wo ewente ba aedāni.

Badinque wēnæidi nāni owoyömö batimpa.

Wēnæidi wentamö ewocadāni tōmānāni māniñömö
 tee mōnincōnē bai quēwēnānipa.

Ayamōidi baacāidi tōmānāni adobaī māniñömö
 wææ cæte bai owodānipa.

³ Wabæca nāni quēwencabo wabæca nāni
 quēwencabo incæ tōmānāni

babidöniaidi wīwa nāni towēinēnō beyæ
 tōmēnāni biinōmæ bete quidi quidi dowænte bai
 wædānipa.

Inguipoga awēnē odeyeidi incæ babidöniaidi tönö
 towēnānipa.

Babidönia iñömö quēwēnāni nāmanque ante
 pōnente tocæte ante māincoo nanguī pōni
 ænte ēadāni beyænque

inguipoga nē godonte ænāni iñömö māincoo nan-
 guī pōni ēadāni badānipa,”

ante Wængonguī anquedo aa pecantapa.

⁴ Ayæ öönædē inö wacā tedepāmo tedecā
 ēñentabopa.

“Botö guiidēmīni ēñēedāni. Minitö tōmēnāni weca
 quēwēmīni incæte,

Tōmēnāni tönö godongāmæ wēnæ wēnæ cædāmaī
 incæmōnimpa, ante cædinque wadæ tao
 pōedāni.

Ayæ, Wængonguī tōmēnāni inānite pāninqe mōnitö
 imōnite pānāmaī incæcāimpa, ante pōnente
 wædinque wodii wīnonte pōedāni.

⁵ Tōmēnāni wēnæ wēnæ cædimāmo iñömö cabo ti
 gæte cōnōninqe bacoo pōni ongompa.

Incæte Wængongui mäninäni nāni wīwa cædimāmo
cōwē pōnente wæcampa.

⁶ Tömēnāni nāni pōnōni bai mīnitō tömēnāni inānite
adobai godoncæminimpa.

Tömēnāni nāni pōnō cædinō beyæ mīnitō wæætē
adopo godō cædinque mempoga ganca
godōmenque godō cæmīni wæcædānimpa.

Ti nāmæ godōnāni bete bai wædānitawo. Mīnitō
wæætē tömēnāni owætadē ti nāmæ
adopopæ pe ñiñænte wempo cædēninque,
mempoga pe ñiñænte wempo cædente bai
cædinque godōmenque ti nāmæ godōmīni
bete wæcædānimpa, angantapa.

⁷ Edæ tömēnāni nāmā incæ, Mönō ñænæmō
imompa, ante pōnente nanguī waēmō
māincoo ēate quēwēnāni iñōnānite
mīnitō wæætē, Tömēnāni ægancadō waēmō
quēwēnāni, ante adinque
tömēnāni inānite adoganca pīinte cæmīni
nantate wædinque tömēnāni wæwente
quēwencædānimpa.

Mänināni iñömō, 'Awēnē odeye nänöogængä bai
contate ongōmompā. Edæ watapæ quēwēmō
imompa.

Wii owæmpoingä bai inömō inte wæwēnāmai cōwē
incæmōimpa,' ante önōwēnenque pōnente
ānewēnānipa.

⁸ Mänōmainō ante nē änāni inte adoque itædē
iñonte tömēnāni nāni wæwēmāmo iñontobæ
pō ate nanguī wæcædānimpa.

Mänionæ tömēnāni nāni wænguimāmo nāni
wæwenguimāmo nāni gue ænenguimāmo
pō wæcædānimpa töö.

Tömänäni onconcoo gonga bæcodocæimpa.

Edæ Wængonguï Awënë iñömö Babidönia iñömö quëwënäni inänite nē apænte ante pangä iñömö edæ tömengä tömää cægaingä ingampa,” ante apænecantapa.

⁹ Inguipoga awënë odeyeidi incæ Babidönia quëwënäni tönö towënäni inte tömënäni adobaï Babidönia quëwënäni tönö nanguï waëmö mäincoo godongämæ ænte èate quëwënänipa. Ìninqe Babidönia nāni quëwëñömö gonga bæcododinqe tēemancoo baca baca æi adinqe tömënäni wæwente Ca ca wæcædänimpa. ¹⁰ Babidönia iñömö quëwënäni nanguï pönï nāni wæwënö adinqe awënë odeyeidi ancai guïñëninque, Mänināni tönö godongämæ wæwënāmaï incæmönimpa, ante gomonga a ongöninqe wæcædänimpa.

“Babidönia mīni waëmö quëwëñömö nē quëwëmīni mīni wæquinque ingæimpa.

Mänïñömö quëwëmīni mäincoo nanguï èate inīmīni inte mīni wæquinque.

Wënæ wënæ cæmīni iñömīnite adoque ooda iñonte Babidönia mīni quëwëñömö do apænte pante wo ëwente batimpa.” ante wæcædänimpa.

¹¹ Inguipoga mäincoo ænte mante nē godonte ænāni iñömö, Edæ æcänö mönö godonguënenco godonte ænguinaa. Nöwo dæ ä, ante wæwente Ca ca wæcædänimpa. ¹² Ìncoo iñömö nāni godonguënenco impa. Oodo tönö padata, dica nāni nanguï godonte ænincacoo tönö pededamö nāni ämoncoo mæ ongoncoopa. Adobaï waëmoncoo nīno nāni ancoo tönö awënëidi waëmoncoo

näni mongæncoo ayæ teda näni ancoo tönö opatawæ incoo mæ ongoncoopa. Quiwæmë ogui wawænque i mäniwæ mæ ongoncoopa. Edepante бага inte näni badönincoo tönö awænque näni nangui godonte æniwæ inte näni badönincoo mæ ongoncoopa. Yaëmenta bodonte näni äni inte näni badönincoo tönö iædo näni äni inte näni badönincoo tönö mänömodo näni anca inte näni badönincoo iñömö mänincoo tömancoo mæ ongoncoopa, ante wæcædänimpa. ¹³ Cäna näni antapo tönö ogui waa öni pæcaqui, ogui waqui näni iya täimö tönö ti nä öni pæqui ayæ ogui wapæ öni pæquimæ, biinömæ tönö oginguipæ, waëmö ædina tönö todigomö mänincoo mæ ongoncoopa. Cæningäidi tönö obegaidi cabayoidi tönö cabayo inte ñä cæte näni wëä godö awotocoo mæ ongoncoopa. Mänincoo tömancoo mæ ongoncoopa, ante wæcædänimpa. Ayæ adobai, Waodäni incæ nê cæte quëwencædänimpa, ante cæningäidi bai godonguënëmö intamompa, ante wæcædänimpa. ¹⁴ Mäninäni Babidönia quëwënëni inänite iimaï ancædänimpa.

“Quincamë ante beinente wæmini incæ mäninca tömanca minitö weca ñowo dæ ancapa.

Mini ëadincoo tönö quinö waëmö mini mänincoo iñömö mänincoo tömancoo ñowo dæ ä inique minitö

ömæpomini inte cöwë wæætë ænämaï incæminimpa,” ante ancædänimpa.

¹⁵ Tömënëni mäniñömö quëwënëni inänite mänincoo näni godönincoo beyæ nê æninäni inte nê nangui ëadinäni incæ Babidönia iñömö quëwënëni näni wæwënö adinque, Mäninäni tönö

godongämæ wæwēnāmaī incæmönimpa, ante gomonga a ongöninque ancai guiñencædänimpa. Ayæ wæwente Ca ca wæcædänimpa. ¹⁶ Ayæ iīmaī yedæ ancædänimpa.

“Babidönia mīni waēmō quēwēñömō nē quēwēmīni incæ mīni wæquinque ingæimpa.

Edæ māniñömō quēwēmīni tōmēmīni weocoo waëmoncoo nīno nāni ancoo tönō awēnēidi waëmoncoo nāni mongæncoo tönō opatawæncoo mānincooque mongæmīni imīnitapa.

Minitō, Mönō waēmō incæmōimpa, ante oodo inte badöincoo tönō dicamō nāni nanguī godonte ænincoo tönō pededamō nāni ämō mānimoncoo mongæmīni imīnitapa.

¹⁷ Incæte adoque ooda iñonte mānincoo mīni äadincoo incæ edæ æmæwo ömæe ewente batimpa, ante nē ænte godönāni edæ wæcædänimpa,” ante angantapa.

Æpæntibædo wipocoo nē tōö tōö cædönāni tönō, Wipodē nē godāni, wipodē nē cædönāni tönō, Wipo inte māincoo godonte ængæimpa, ante nē māo godāni tōmānāni mānināni gomonga a ongoncædänimpa. ¹⁸ Babidönia nāni quēwēñömō gonga bæcododique tēēmancoo baca baca æi adinque iīmaī yedæ ancædänimpa, “Iī Babidönia nāni waēmō quēwēñömō bai wayömō nāni waēmō quēwēñömō edæ dæ ampa, ante wæcædänimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadique Ca ca wædinque iīmaī yedæ ancædänimpa,

“Babidönia nāni waēmō quēwēñömō nē quēwēnāni
nāni wæquinque ingæimpa.

Māniñömō æpæntibædo wipocoo nē ēadāni inte
tömēnāni nāni godōnincoo māniñömō quēwēnāni
inānite godonte æninque tōmānāni nanguī
ēadāni badānitapa.

Ayæ adoque ooda iñonte Babidönia nāni
quēwēñömō tōmāo æmæwo ömæe ewente
batimpa, ante ancædānimpa,” angantapa.

²⁰ Māninö ante änāni ate, Tōmāmīni öönæde iñömō
quēwēmīni māniñömō wo ewente i adinque
watapæ tocæmīnimpa.

Wængonguī quīmīni adobāi
Itota nänö nē da godongaīmīni tönö
Wængonguī beyæ nē apænemīni tönö
mīnitö tōmāmīni māniñömō wo ewente i adinque
watapæ tocæmīnimpa.

Edæ, Mīnitö imīnite æbänö wēnæ wēnæ cædāni,
ante adinque

Wængonguī tōmēnāni nāni quēwēñömō quēwēnāni
inānite apænte āninque pangā ate
tocæmīnimpa, ante angantapa.

²¹ Ayæ Wængonguī anquedo nē tæi emongā
iñömō dicabo nāni mö mö equinca bai ñænængade
dicabo æninque æpæntibæ cæncadēmæ wo gui-
itodōninque iūmaī angantapa.

“Māninca æpæntibæ cæncadēmæ tæi wo
guiitodōmo guī bai

Babidönia nāni waēmō quēwēñömō
wo ewente dæ ba ate cōwē adāmaī incædānimpa.

²² Īninque, Adapate nāni ampogainö incæ
āmotamīni nāni angainö incæ

ööña bai nani we we öongainö incæ todompeta
nani ancadeca nani we we öongainö incæ
mäniñömö cöwë ëñënamai ingæimpa.

Quiëmë badönäni incæ në badongainäni
mäniñömö cöwë dæ ancädänimpa.

Tömënëni nani dicabo mö mö equinca inte
cæyönäni dicabo dadi dadi cæyedë ä bai
mäniñömö cöwë wii ëñenguinänidö angüënë.

²³ Do nani ti wodönoincade mäniñömö cöwë tica
ënënamai ingæimpa.

Onquiyængä ingante në monguingä mäniñömö
cöwë dæ ä mönämäi inguinänidö angüënë.

Mäniñömö mäincoo ænte mante në godonte
ænäni iñömö inguipoga ñænænäni inte
ongongadänimpa.

Ayæ idöidi yewænte bai cædinque mäniñömö
quëwënäni, Waëmö mäincoo, ante wapiticæ
änewënäni beyænque wabæca nani
quëwencabo wabæca nani quëwencabo
incæ tömänäni nani quëwencabo oda cæte
gogadänimpa,” angantapa.

²⁴ Wængongui beyæ në apænegaïnäni inänite
wænöninque mäniñömö quëwënäni incæ
Wængongui quinäni inänite godömenque wænönäni
wængadänimpa. Edæ inguipoga wænönäni në
wængainäni tömänäni mäniñömö wænönäni wænte
bai ingadänimpa.

19

¹ Babidönia wo ewente ba ate öönädë iñömö
woadäni tæiyænäni adotedæ ogæ tededäni bai
ëñentabopa.

“Mönö Awënë ingante watapæ apænecæimpa,
ante, Adedoya, äninque,
Mönö Wængongui mönö imonte, Quëwencæminimpa,
ante nē Ængä inongä ingampa.

Tömengä ñäö emongä inongä ingampa. Ayæ
tömengä tæi piñægä inongä ingampa.

² Edæ, Wængongui, Iimaï pancæboimpa, ante nänö
apænte angainö bai cædinque tömengä cöwë
nö cæte waa pangampa.

Babidönia iñömö onquiyægä maincoo beyæ nē
towente quëwënogä bai impa. Mäniñömö
quëwënäni nē wiwa cædäni beyænque
ingui-poga quëwënäni wæætë nē wiwa cædäni
badäni adinque

Wængongui mäniñömö quëwënäni inänite apænte
ante pangantapa.

Wængongui ingante nē cædinäni inänite adodäni
wænönäni adinque tömengä wæætë
tömënäni inänite wænogä wænänitapa,”
ante änänitapa.

³ Ayæ wæætë ogæ tededinque,
“Adedoya,” änänipa.
“Mäniñömö tēmancoo cöwë baca baca æicöompa,”
ante änänitapa.

⁴ Mäniñedë Wængongui nänö tæ contaimpaa
tæ contayongante nē aadäni nē Picænäni
bæinticoatodo ganca inäni tönö münäni quëwënäni
mënaa go mënaa inäni iñömö ædæ wææninque,
Bitö Wængongui Awënë imidö anguënë,
äninque “Amëë, Adedoya,” ante aa pedänitapa.

⁵ Wængongui nänö tæ contaimpa inö tedepämo
iimaï tededinque,

“Wængongui ingante nē cæmini inte

tömengä ingante nē guiñente eñente cæmīni iñömō
 nē awēnēidi imīni incæ önömīnique incæ mīnitō
 tōmāmīni,
 Mönō Wængonguī ingante watapæ apænecæimpa,
 ante apæneedāni,” angantapa.

Wængonguī Codotedo monguingä ææmæ

⁶ Ayæ adobaī waodāni tæiyænāni adotedæ ogæ
 tededāni baī eñentabopa. Ñænæ tēñabo ä baī
 detæbo eyequei tē baī eñentabopa.

“Adedoya,

Mönō Wængonguī Awēnē Tömää nē Cægāimi inte
 bitō nē Awēnē badinque aabipa.

⁷ Mönō watapæ pōni entawēninque waa tocæimpa.
 Edæ tömengä ingante apænedinque mönō, Bitō
 ñäō emōmi imipa, ante angæimpa.

Edæ Wængonguī Codotedo nänö monguinö oo
 bacæ cæpa cæmīni.

Onquiyængä tömengä ingante monguingä
 iñömō, Botō nänöogængä inguingä oo
 poncæcæimpa, ante nāmā incæ eyepæ cæte
 ä ongongampa.

⁸ Tömengä ingante weocoo nīno nāni ancoo waēmō
 näämæntacoo

nänö wēñaquincoo, ante pönönāni ængä ingampa.

Wængonguī quīnāni nāni nö cægaincoo incæ
 nīno nāni ancoo waēmō näämæntacoo baī impa.”

⁹ Ayæ Wængonguī anquedo botō imote angan-
 tapa. “Īmaī ante yewæmōe. ‘Wængonguī Codotedo
 monguingä ææmæ pō becædānimpa, ante wente
 ængä nē ponguināni nāni toquinque.’ ” Tömengä
 ayæ godömenque äninque, “Mäninö Wængonguī
 nänö nö angainö impa,” ante angantapa.

10 Ante añongä botö tömengä önöwa inö ædæ wææninqe tömengä ingante watapæ apæneceæte ante cæyömote tömengä wæætë, “Mänömaï cædämaï imäwe, angantapa. Botö önonque bitö bai Wængonguï ingante në cæbo imopa. Edæ bitö tönñadäni Itota nänö apænegainö në eñente cædäni bai botö adobai Wængonguï ingante në cæbo imopa cæbii. Edæ Wængonguinque ingante ædæ wææninqe, Bitö Wængonguï Awënë imidö anguënë, ante apænee,” ante angantapa.

Itota godö odömongä beyænque Wængonguï beyæ në apænedäni iñömö tömengä nänö apænegainö ante ewocadinque apænedänipa.

Näämænta cabayoga në tæ contacä mongænte pongampa

11 Botö ayæ ayömote öönæde wi ænete bai bayö cabayo näämænta eñacä a ongongä atabopa. Cabayo në tæ contacä mongænte pongä iñongante, Tömengä cöwë pönëinqe në Ædæmö Cædongä inte, Näwangä impa, ante në Apænegaingä ingampa, ante pemonte ingampa. Wænæ wænæ cædäni inänite tömengä nö apænte ante pänongä ingampa. Ayæ guëadö guëa cædinque tömengä në nö cædongä ingampa. 12 Tömengä awinca gonga bæcodote bai emongä inte tömengä ocaboga pogantacoo encacä ingampa. Tömengäa emöwo yewæmonte ii incæte mänïwo tömenganque nänö eñëwo impa. Wadäni ædö cæte eñenguinänii. 13 Tömengä weocoo yacoo wepænë guipænente mongængampa. Tömengä emöwo iñömö, Wængonguï nänö Angainö, ante pemonte ingampa.

14 Öönædē iñömö tontadoidi tömengä miñæ tee empote godänipa. Tömēnāni nīno nāni ancoo waēmō nāāmēntacoo mongæninque cabayoidi nāāmēnta ēñadāni yabæ tæ contate mongænte godänipa. 15 Cabayoga nē tæ contacā iñömö wabæca nāni quēwencabo wabæca nāni quēwencabo incæ waodāni inānite yaēmenca pancæte ante ānīnque tömengä önönē inö yaēmē tipængaa waingamē engamē ēnedinque yædæ tadete ongongantapa. Tömengä iñömö nē tæiyæ awēnē tömengä nempo quēwēnāni inānite aacā bai adobai tömāmæ quēwēnāni inānite, Īīmaī cæedāni, ante aacæcāimpa. Yowepæ ante yowecoo nāni pīnā pīnā gāwate cæincadedē pīnā pīnā gāwate bai cædinque cabayoga nē tæ contacā Wængonguī ænguī nänö angainö beyænque iñömö tömēnāni inānite piinte pancæcāimpa. Wængonguī adocanque Tömāā nē Cægaingä ingampa. 16 Cabayoga nē tæ contacā iñömö weocoo yacooga adobai tömengä önontiya ĩi emōwo yewæmonte ēñacampa. “Ayæ waodāni awēnē odeyeidi iñönānite tömengä Tæiyæ Awēnē Odeye inongä ingampa. Tömengä iñömö awēnēidi tömānāni Awēnē inongä ingampa,” ante pemonte ingampa.

17 Ayæ wacā Wængonguī anquedo nænque cæncadēmö inö a ongongä atabopa. Tömengä öönædē gāmænö nē cæwodāni tömānāni inānite yedæ ante aa pedinque, “Adoyömö godongāmæ pōedāni. Edæ Wængonguī tæiyæ ææmæ ante pō cæedāni. 18 Awēnē odeyeidi incæ tontado capitäoidi incæ onguīñænāni tæi piñænāni incæ cabayoidi incæ cabayocooga inte nē tæ contate

godäni incæ iinäni tömänäni wænäni ate tömënäni baö cæncæte ante pöedäni. Waodäni awënë beyænque nê cæte quëwënäni incæ nê nämä cæte quëwënäni incæ awënëidi incæ önönäni que incæ tömänäni baö pö cæedäni,” ante aa pecantapa.

¹⁹ Ayæ botö ayömö mönö guiñëongä tönö inguipoga awënë odeyeidi tönö tömënäni tontadoidi tönö adoyömö godongämæ pöningue, Cabayoga nê tæ contacä ingante ayæ tömengä tontadoidi inänite mönö guëadö guëa cæcæimpa, ante cædäni atabopa. ²⁰ Incæte guëadö guëa cæyönänite tömënäni näëmæ mönö guiñëongä ingante bæi ongöningue, Wængongui beyæ nê apænebo, ante nê babæ äningä ingante adobaï bæi ongönänitapa. Nê babæ ämongä iñömö mönö guiñëongä beyænque mä pönï cæcä inongäimpa. Inique mönö guiñëongä tömengä nänö yewæmöi nê yewæmöinäni iñömö tömengä nänö ëmönö baï näni badöinca gäänë ædæ wææningue nê apænedäni inte tömënäni nê babæ ämongä nänö mä cædö adingue guiñente wædingue oda cædönänipa. Inique mönö guiñëongä tönö nê babæ ämongä ayæ miina quëwëñö nate atopode näni änantibæ gonga baï näni bæcodotibæ cæncadëmæ wido cædänitapa. ²¹ Tömëna miñæ pönäni inänite guiquënë cabayoga nê tæ contacä tömengä önönë inö yaëmenca yædæ tadete ongöningue do wæmongä wænänitapa. Inique nê cæwodäni baö ade cænänique tömänäni nê wænünäni baö tömo pönï cæwënönäni inänitapa.

Miido wadepo iñonte æbänö baquü

¹ Wængonguü anquedo wacä iñömö tadömengadænguipo ontatodemö wi ænequi tönö ñänömencaimë ñænæmë önönempo næængä inte öönæde inö ta wæængä atabopa. ² Ta wææninqe tömengä dadagöö ingante bæi ongöninge tömengä nänö miido wadepo ganca ñä cæyænte ongonguinque ante ñä cæyængantapa. Mäningä dadagöö wëenëñedë tæntæ në ingaingä inte wënæ awënë Tatäna ingacäimpa. ³ Mäningä ingante ñä cæyæninque tadömengadænguipodë wido cædinque ontatodemö wi ænequi inte tee mönedinque tömengä dæca ontatodemö ædæmö tee moncacantapa. Waodäni wabæca nani quëwencabo ayæ wabæca nani quëwencabo iñönänite tömengä, Oda cæte gocädänimpa, ante miido wadepo ganca cädämaï incæcäimpa, ante Wængonguü anquedo dadagöö ingante wido cæcantapa. Mänimpodepo iñque ba ate tömengä ingante, Wantæ iñö ñimpo cæte goquingä, ante ñimpo cæcä gocæcäimpa.

⁴ Ayæ awënëidi tæ contaimpacoö botö atabopa. Wængonguü Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinque Wængonguü nänö angainö ante apænedäni beyænque tömënäni inänite wangö tamencadäni wængadänimpa. Wangö tamencadäni wængainäni nani önöwocaidi botö ñöwo atabopa. Mäninäni iñömö mönö guiñenongä ayæ pöningä ingante adinque, Bitö Wængonguü Awënë bai imidö anguënë, ante apænedämaï inte ayæ tömengä nänö emönö bai

näni badöinca gäänē ædæ wæænte apænedämaï ingadänimpa. Ayæ tömēnāni näni önönemö inö näni önompö inö mönō guiñēnongä ayæ pöningä nänö yewæmōi yewæmönāmaï ingadänimpa. Adodāni ñāni ömæmöninque adoque müido wadepo ganca Itota Codito tönö godongämæ aadänitapa.

⁵ Mänināni täno ñāni ömæmönāni incæte wadäni guiquēnē nē wængaināni incæ müido wadepo iinque go ate ñāni ömæmoncädänimpa. ⁶ Täno ñāni ömæmönāni iñömö nē tæiyæ waemö ināni inte näni toquinque. Edæ wadäni nē wængaināni mempoga ganca näni wænguimämo iñonte mänināni iñömö wænāmaï incädänimpa. Wæætē, Wængonguï qui, ante nē godönāni bai tömēnāni adobai, Wængonguï beyæ, ante ayæ, Itota Codito beyæ, ante cæcädänimpa. Ayæ müido wadepo iñonte Itota Codito tönö godongämæ aacädänimpa.

Tatäna nänö æmcæwo ömäe ewenguinö ante

⁷ Tadömengadænguipodē tömengä nänö tee mönecönē ñā cæyænte quëwēnongä iñongante Tatäna ingante müido wadepo iinque go ate ñi cæyænāni ta gocæcäimpa. ⁸ Ta godinque tömengä inguipoga æmatæ go æmatæ go godinque Gogobæ näni ämæ ganca go Mäogobæ näni ämæ ganca gocæcäimpa. Inguipoga tömäo godinque tömengä, Wabæca näni quëwencabo ayæ wabæca näni quëwencabo näni oda cæte goquimämo ante cædinque tömēnāni inänite, Mönō guëadó guëa cæquinque gocæimpa, ante, Adoyömö godongämæ pödäni, ante ancæcäimpa. Æpodänidö inänii, ante tömēnāni æpæ wedeca emönai bai tæiyænāni inguinänidö anguēnē.

9 Mäninäni bogænæ tömäo godäni bai tömënäni adobai inguipoga tömäo gocædänimpa. Wængongui nänö waadete quëwëñömö tömengä quinäni quëwëñömö godämæ gocædänimpa. Goyönäni öönädë inö gonga bæcodote gao wææñonte gonte wæncædänimpa. ¹⁰ Ayæ wënæ tömënäni inänite, Oda cæte gocædänimpa, ante në cægaingä ingante Wængongui bæi ongonte atopode nani änontibæ gonga bai nani bæcodotibæ cæncadëmæ wido cæcæcäimpa. Edæ mönö guiñëngä tönö, Wængongui beyæ në apænebo, ante në babæ äningä tönö tömëna dobæ mäniñömö wido cæte ingadainpa. Inique mäninäni itädë woyowotæ mäniñömö quëwente cöwë wantæpiyæ nani wæwenguimämo ingæimpa.

Wængongui Awënë tæ containpa näämæntapa

¹¹ Ayæ awënë tæ containpa ñænæmpa näämæntapa adinque botö mänimpaa në tæ contacä ingä adobai atabopa. Inguipoga tönö öönæ iñömö tömengä ingante ate bai cædinque wodii godinque nana ongöñömö edæ ædömë gote dæ änimpa.

¹² Ayæ në wængainäni tömänäni awënëidi incæ önönänique incæ mänimpa gäänë a ongönäni atabopa. A ongöñönäni mincayontacoo wataa wataa wi æmpote ongoncoopa. Ayæ mincayonta wataa Wængongui, Quëwenguinta, ante tömengä yewæmongaintaa wi æmpote acantapa. Mänii mincayontacoo iñömö, Në wængainäni tömänäni æbänö cægainäni inäni, ante Wængongui mänintacoo nänö yewæmongainö ante wataa wataa tömanta adinque në wængainäni nani cægai

ganca, ante tömēnāni inānite adoganca apænte ante pangantapa. ¹³ Ayæ æpæntibæ cæncadēmæ do wængaināni wæætē ta pönānitapa. Æmæwo wængaināni incæ ta pönānitapa. Tömēnāni nāni wænte ongōñömō nē ongongaināni inte wadæ ta pönānitapa. Ta pönāni ate, Æbānō cægaināni inānii, ante adinque Wængongui adocanque adocanque nänö cægaī ganca, ante tömengä ingante adoganca apænte ante pangantapa.

¹⁴ Māniñedē ganca ayæ baganca wænāmaī quēwencädānimpā, ante ayæ, Wængaināni nāni ongōñömō adobaī dæ bacæimpā, ante cædinque mönō Awēnē wængaināni æmæwo nāni wængaimāmo tönō nāni wænte ongōñömō æpæntibæ gonga baī nāni bæcodotibæ cæncadēmæ wido cæcantapa. Mānintibæ mempoga ganca æmæwo nāni wænguimāmo baī impā.

¹⁵ Wængongui, Quēwenguinta, ante nänö yewæmongaintaa adinque, Æcānō emōwo mānintaa yewæmönāmaī i, ante adinque nē yewæmönāmaī ingaināni inānite mānintibæ cæncadēmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobaī dæ änimpā. ² Ayæ godömenque botō ayömote Wængongui nänö tæiyæ waemō quēwēñömō müi Eedotadēē nāni añömō öönæde inō ta wææ atabopa. Onquiyængä nē moncæ cæcä iñömō, Botō nänöogængä inguingä waa

acæcäimpa, ante waëmö weocoo nē mongængä bai iī quēwēñömö adobaī waëmö pōni emö inte ta wææ atabopa.

³ Ayæ Awēnē tæ containpa inö tedepāmo yedæ ä ēñentabopa. “Ñöwo Wængongui nänö owoquincö waodāni weca ongö inique tōmengä tōmēnāni tōnō quēwenguingä ingampa. Tōmēnāni tōmengä guidēnāni bacædānimpā. Ayæ Wængongui incæ, Botö tōmēmo mīnitö Wængonguimo incæboimpā, ante tōmēnāni weca ongoncæcäimpā. ⁴ Tōmēnāni wēñapæ tamonte wædi tōmāmæ Wængongui wadæ cæmoncæcäimpā. Māniñedē æmæwo mōnō wænīmāmo incæ mōnō wæwēnīmāmo incæ Ca ca mōnō wædimāmo incæ nantate mōnō wædimāmo incæ tōmää mānīmāmo dæ angæimpā. Edæ wēenēñedē inīmāmo incæ inique batimpā,” angantapa.

⁵ Ayæ Awēnē tæ containpaa nē tæ contacä iīmaī angantapa. “Tōmää inīmāmo botö ñöwo mīi cæcæboimpā,” angantapa. Ayæ, “Mänömainö ante botö āninö edæ nō pōni iī inique māninö ante wede pōnengæimpā. Mänömaī beyæ bitö iīmaī ante yewæmōe,” angantapa.

⁶ Ayæ tōmengä wæætē botö imote iīmaī āninue, “Dobæ inique batimpā. Botö Tānobo ingaīmo inte Tōmāmo inguīmo imopa. Wēenēñedē tōmää nē Badongaīmo inte tōmää nē inique Cæbo incæboimpā. Edæ nē gæwænāni, Æpæ beinēmōnipa, ante nē ānāni inānite botö æpæ tapæ quēwengui mæ ōnonque godōmo becædānimpā. ⁷ Tæi emonte nē gänä cædāni inānite botö mānincōo botö nē godonguincōo godōmo æncædānimpā. Ayæ botö incæ tōmēnāni Wængonguimo incæboimpā.

Tömänäni wæætē botö wēñænāni bacædānimpā.
 8 Wæætē guiñente awædö, ante nē änāni tönö
 nē pönēnāmaī ināni guiquēnē, nē wiwa cædāni
 tönö wacā ingante nē wænōnāni guiquēnē, nē
 towente quēwēnāni tönö idōidi nē ināni guiquēnē,
 Wængonguī impā, ante nāni badōnincā gäänē ædæ
 wææninque nē apænedāni tönö nē babæ änāni
 tōmānāni guiquēnē, mānīnāni iñōnānite atopode
 nāni ānontibæ gonga baī nāni bæcodotibæ incæ
 tōmēnāni nāni wæcōñōmō bacæimpā. Mānīī
 nāni wænguīmāmo iñōmō mēmpoga ganca nāni
 æmæwo wænguīmāmo impā,” angantapa.

Mū Eedotadēē quēwēñōmō

9 Wængonguī anquedoidi ōnompo æmæmpoque
 go mēa ganca ināni ōnompo æmæmpoque go
 mēa ganca owætacoo waodāni iinque nāni
 wænguīmāmocoo eyede engate intacoo nē
 næænāni iñōnānite adocanque botö weca
 pōninque, “Pöe,” angantapa. “Wængonguī Codotedo
 nānōogængä nē baquingä nē monguingä iñongante
 botö bitö imite odōmōmo acæbiimpā,” angantapa.

10 Ayæ Wængonguī Ōnōwoca incæ botö imote
 bæi ongonte baī cæyongante botö wīimonte baī
 iīmaī atabopa. Wængonguī anquedo botö imote ō
 ænte māo onquiyaboga tæcædæca pōnī cōnongä
 ongonte ayōmo Wængonguī tæiyæ wæmō nänö
 quēwēñōmō Eedotadēē nāni āñōmō ōönædē inö ta
 wææñonte tōmengä botö imote odōmongä atabopa.

11 Mānīī quēwēñōmō Wængonguī ñāō ēmōnongä
 baī apāitimpā. Ayæ dica aatapeca nāni anca
 emō baī awocawænta baī wæēmonca inimpā.
 Waodāni nāni nanguī godonte ænincā baī

ñäö apäite bai Eedotadëë inimpa. ¹² Mänii quëwëñömö godämæ tæimö wææ cædi ænöwæmö ongönimpa. Ayæ wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mëa ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önompo tipæmpoga go mëa ganca ongönänitapa. Mäninemö önompo tipæmpoga go mënemonga odemoncooga idægoidi nani cabo tipæmpoga go mencabodäniya iñönänite tömëni emöwocoo yewæmonte inimpa. Wayömö odemonga adocaboque emöwo wayömö odemonga adocaboque emöwo yewæmonte inimpa. ¹³ Nænque tamönö inö mëa go adoque odemö inimpa. Nænque wæidö inö mëa go adoque odemö inimpa. Betamonca inö mëa go adoque odemö inimpa. Adobai æmatæ inö mëa go adoque odemö inimpa. ¹⁴ Mänii quëwëñömö wænömënæca mænonte wææ cæqui, ante nani ñönönincacoo iñömö önompo tipæmpoga go mencaa inimpa. Mänincacoo önompo tipæmpoga go mencaa incæ Wængongui Codotedo nänö da godongainäni önompo tipæmpoga go mënaa inäni tömëni emöwo incæ adocanque emöwo wacaa adocanque emöwo wacaa yewæmonte ëñacaimpa.

¹⁵ Wængongui anquedo botö imote në apænedingä iñömö tee manguimpa oodo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa

næængantapa. ¹⁶ Mänii quëwëñömö æmataæ adoganca æmataæ adoganca mænonte inimpa. Doyæ inö betamonca inö adoganca inimpa. Tömengä mänii quëwëñömö tee manguimpa inte tee mante doyæ inö ænōwæmō inö doo miido dootiento quidōmetodo ganca inimpa. Ayæ betamonca iñömö adobai doo miido dootiento quidōmetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö tetenta i coatodo mēetodo ganca inimpa.

¹⁸ Mänii wææ cædi aatapeca nani änonca inte mænōni impa. Mänii quëwëñömö guiquënë oodo inte awocawænta bai waëmō inte mænōni impa. ¹⁹ Mänii quëwëñömö wænōmēnæca mænonte wææ cæqui, ante ñönōnincacoo iñömö, Waëmō emongæimpa, ante tōmēnāni quincacoo nani nanguï godonte ænincacoo ænte māmō ñönōnincacooga bewodō bewodō cædänitapa.

Tänoca ñönōninca aatapeca nani anca inimpa.

Waca ñönōninca guiquënë tapidoca nani anca inimpa.

Waca ñönōninca guiquënë aagataca nani anca inimpa.

Waca ñönōninca guiquënë etemēnaotaca nani anca inimpa.

²⁰ Waca ñönōninca guiquënë oöninteca nani anca inimpa.

Waca ñönōninca guiquënë codōnadīnaca nani anca inimpa.

Waca ñönōninca guiquënë coditooditoca nani anca inimpa.

Waca ñönöninca guiquënë bedidoca nani anca
inimpa.

Waca ñönöninca guiquënë topatioca nani anca
inimpa.

Waca ñönöninca guiquënë coditopadataca nani
anca inimpa.

Waca ñönöninca guiquënë aatintoca nani anca
inimpa.

Waca tömanca guiquënë amatitaca nani anca inimpa.
Mänimpoca inimpa.

²¹ Mänii wææ cædinemö iñömö önompo
tipæmpoga go mënemonga iñömö pededamö nani
ämö önompo tipæmpoga go mëmonga inte mænonte
inimpa. Wææ cædinemö incæ wææ cædinemö
incæ pededamö adomonque adomonque inte
mænöninemö inimpa. Mänii quëwëñömö taadö
ñænænö godö oodo inte mænöwate taadö
awocawænta bai waëmö inimpa.

²² Mönö Wængongui Awënë adocanque Tömää
në Cægaingä tönö Wængongui Codotedo tönö
mäniiñömö cöwë ongöna inique godongämæ
quëwënäni guiquënë, Mönö Wængongui oncönë
guicæimpa, ante quinante anguinanii. Edæ
Wængongui tæiyæ waëmö oncö mäniiñömö dæ
ä atabopa. ²³ Wængongui në ñäö bai ëmönongä inte
ñäö apäiquingä bai inongäimpa. Ayæ Wængongui
Codotedo iñömö nani ti wodönoincade bai i
inique mänii quëwëñömö iñömö nænque incæ
apäicä incæ quinante godömenque ñäö apäiquii.

²⁴ Wabæca nani quëwencabo ayæ wabæca nani
quëwencabo inänite Wængongui ængä beyænque në
quëwënäni inte mäninänique mänii ñäö apäiyömö
cægoncædänimpa. Adobai inguipoga awënë

odeyeidi waëmoncoo nani ëadincoo mänïñömö ænte poncæðänimpa.

²⁵ Mänïi quëwëñömö woyowotæ inämaï ingæïmpa. Ìninqe mänïñömö wææ cæðinemoncoo iimö iñö iimö iñö iñonte cöwë tee mönedämaï ingæïmpa. ²⁶ Wabæca nani quëwencabo ayæ wabæca nani quëwencabo incæ tömënanï waëmoncoo nani ëadincoo mänïñömö ænte poncæðänimpa. Mänïi quëwëñömö waa quëwëñömö impa, ante waa ate apæñecæðänimpa. ²⁷ Quiëmë wënæ wënæ i mänïñömö cöwë guidämaï ingæïmpa. Në wiwa cæðani incæ në babæ änäni incæ mänïi quëwëñömö guidämaï inguinänidö angüënë. Wæætë Wængongui Codotedo, Quëwenguintaa, ante nänö yewæmointaa në yewæmönäni guiquënë tömënanique guicæðänimpa.

22

¹ Ayæ Wængongui anquedo botö imote önö quëwenguimæ odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ containpa inö tapæmpa. ² Mänïñömö tadinque mänïi quëwëñömö taadö ñænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguiwæ pæwæ atabopa. Mäniwæ iñömö tömenca wacä apäicä iñonte wacä apäicä iñonte incapa. Ìninqe adoque wadepo iñedë önompo tipæmpoga go mäa ganca mänimpoga mäniwæ incayedë impa. Wabæca nani quëwencabo ayæ wabæca nani quëwencabo incæ mänimæca quëwënanï tömänäni

mäniwæ öñabocoo beyæ gançæ bacædänimpa, ante ëñabocoo. ³ Wængongui pante nänö angainö beyænque quincoomé wënæ wënæ bagatii mäninö mäniñedë dæ angæimpa. Wængongui tönö Wængongui Codotedo nana aacæ tæ containpa manii quëwëñömö mä ongoncæpaimpa. Tömengä ingante në cædönäni iñömö tömengä ingante watapæ apænedinque tömengä ingante cæcædänimpa. ⁴ Tömengä awinca acædänimpa. Ayæ tömengä ëmöwo tömënäni önönemö inö yewæmonte incædänimpa. ⁵ Mäniñömö woyowotæ inämaï ingæimpa. Edæ mäniñömö quëwënäni beyæ Wængongui Awënë në ñäö ëmönongä inte apäiuingä inongampa. Ìinque nænque ñäö apäidö incæ ti wodönoincade ënënö incæ quinante ayæ apäiquii. Ayæ mäniñömö quëwënäni adodäni cöwë wantæpiyæ aacædänimpa.

Itota Codito oo poncæcäimpa

⁶ Ayæ Wængongui anquedo botö imote apænedinque, “Mäninö bitö ëñënö nö pönï i ìinque mäninö ante wede pönengæimpa. Wængongui beyæ në apænedönäni tömengä Önöwoca ingante ëwocadinque apænedänipa. Tömënäni nani në ëwocadongä Wængongui Awënë iñömö tömengä anquedo ingante apænedinque, Bitö botö imote në cædönäni weca godinque, Æbänö oo pönï baquimpa, ante odömömi acædänimpa, ante da pönongä pongantapa,” ante botö imote apænecantapa.

⁷ Itota Codito, “Aedäni. Botö oo ocæ ëmænte ponguïmo imopa. Ìi mincayontaa Wængongui

beyæ apænedinque nāni yewæmonte angainö ante nē ēñente cædāni iñömö nāni toquinque,” ante apænecantapa.

⁸ Botö Wäömo inömo imopa. Mäninö Wængongui anquedo nänö äñinö ante nē ēñenimo inte botö mänii tömengä nänö odömöninö ante nē adimo inömo imopa. Wængongui anquedo angä ēñenique ayæ odömongä adinque botö nē odömöningä önöwa inö ædæ wæænte tömengä ingante watapæ apænecæte ante cætabopa. ⁹ Cæyömote tömengä wæætē, “Mänömaï cædāmaï imäwe, angantapa. Botö önonque bitö bai Wængongui ingante nē cæbo imopa. Ayæ bitö töninadāni Wængongui beyæ nē apænedönāni tönö ii yewæmöintaa nāni angainö ante nē ēñente cædāni tönö botö tömēnāni bai adobai Wængongui ingante nē cæbo imopa cæbii. Edæ Wængonguinque ingante ædæ wææninque, Bitö Wængongui Awēnē adobique imidö anguēnē, ante apænee,” angantapa.

¹⁰ Wængongui anquedo godömenque botö imote iïmaï angantapa. “Edæ mänömaï baquiönæ oo pönï ingæimpa cæbii. Iï yewæmöintaa Wængongui beyæ apænedinque nāni angainö ante bitö wē wodönāmaï inte do apænee. ¹¹ Nē wēnæ wēnæ cædönāni inänite ee abi godömenque wēnæ wēnæ cæcædänimpa. Tömēnāni nāni pönēnö wentamö bai nē entawēnāni inänite ee abi godömenque nāni pönēnö wentamö bai entawencædänimpa. Nē nō cædāni inänite ee abi godömenque nō cæte quēwencædänimpa. Nē tæiyæ waëmö entawēnāni inänite ee abi godömenque tæiyæ waëmö entawencædänimpa.”

¹² Itota Codito, “Aedāni. Botö oo ocæ emænte

ponguïmo ïmopa. Ocæ ãmænte pöninge botö tömömo godömo näni ænguincöo, ante næænte ponguïmo ïmopa. Tömänäni æbänö cädäni, ante adinque botö tömönäni näni cægaï ganca ante adoganca godömo æncädänimpa. ¹³ Botö Tänobo ingaïmo inte Tömämo inguïmo ïmopa. Tömää badönämaï ïñedë botö Do Quëwengaimo ïmopa. Ayæ tömää ïinque bayedë incæ botö Ayæ Pöni në Quëwëmo incæboïmpa. Wëenëñedë tömää në Badongaimo inte tömää në ïinque Cæbo incæboïmpa.”

¹⁴ Weocoo yamonte bai mïmönë në mënongate ïnäni ïñömö tömönäni näni toquinque edæ mänïï quëwëñömö wææ cædinemö ïñömö go guïquinäni ïnänipa. Go guïdinque tömönäni quëwenguïwæ quëwenguinca bequinäni ïnänipa. ¹⁵ Wiwa cädäni guiquënë mänïï quëwëñömö yabæque ïñömö ongonte wæquinäni ïnänipa. Idöidi në ïnäni, në towente quëwänäni, wacä ingante në wänönäni yabæque ongönänipa. Wængonguï impa, ante näni badöninca gäänë ædæ wææninque në apænedäni, në babæ änäni tönö, Babæ äinëmönipa, ante në änäni tönö tömönäni tömänäni mänïï quëwëñömö yabæque ïñömö quëwenguïnäni ïnänipa.

¹⁶ “Botö Itotabo ingaïmo ïmopa. Mäninö botö angainö ante nö impa, ante botö ïmote godongämæ näni pönencabodäni tömänäni ïänite apænecä ëñencädänimpa, ante cædinque botö do botö anquedo ingante mïnitö weca da pönömo pongantapa. Botö docä Awënë Dabii nänö Wæmæncoo ingaïmo inte adobai nänö Pæïmo ïnömo ïmopa. Botö wadaamö bai ñäö bayö apäimö

baï ïmopa.”

17 Wængonguï Tæiyæ Waëmö Önöwoca tönö Wængonguï Codotedo nänöogængä nāni ānongä, “Pöedāni,” ānapa. Āñöna tömēnāni tömēna ïnate nē ēñēnāni inte adobaï, “Pöedāni,” ancædānimpa, āmopa. Nē gæwænte ïnāni tömānāni pö becædānimpa, āmopa. Nē beinēnāni ïñönānite, Minitö quēwenguïmæ, ante önonque pönonguïmæ incæ pö ænte becæminimpa, ante āmopa.

18 Īi yewæmöintaa Wængonguï beyæ nē apænedāni nāni angainö ante nē ēñēnāni tömānāni ïnānite, Ee aedāni, botö wææ āmopa. Edæ mäninö nāni angainö ante godömenque wadö ānāni ïnānite Wængonguï pancæcäimpa. Īi yewæmöintaa quiēmē nāni pante wæwenguincoo, ante yewæmonte adinque Wængonguï nē wadö ānāni ïnānite mänincoo baï godömenque pancæcäimpa. 19 Ayæ Īi yewæmöintaa Wængonguï beyæ nē apænedāni nāni angainö incæ pancadea æninque nē wëä godonte baï cædāni ïnānite Wængonguï quēwenguïwæ quēwenguinca godönāmaï incæcäimpa. Tömengä adobaï, Botö tæiyæ waëmö quēwēñömö mänñömö guidāmaï incæminimpa, ante ancæcäimpa. Mänñ quēwenguïwæ ante mänñ quēwēñömö ante Īi yewæmöintaa yewæmonte impa.

20 Mäninö ante, Nö impa, ante nē apænecä ïñömö tömengä ïñömö, “Ao, botö oo ocæ émænte ponguïmo ïmopa,” angantapa. Āñongante botö,

Mänömaï baquïnö anguēnē, ante, Amëë, āninque, Awēnē Itota pöe, āmopa.

21 Awënë Itota Wængongui nänö guidënanï inänite waadete godö cæcæcäimpa. Mänömaï baquinö angüënë, ante botö, Amëë, ante mäninque ämopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690